


清容居士集 附札記

八



貴州省圖書館
中文書



清容居士集

附札記

(八)

J
178
1.2070

袁 楠 撰

清容居士集卷第二十五

碑

獻州交河縣先聖廟碑

尊聖人而親之。有爲廟之道焉。廟也者。享之以寧其神者也。氣行于太虛。莫窮其神。天地日月星辰。久而不息者也。聖人之道。與天地竝。而其炳然立言。品節備具。則猶夫日月星辰也。人生則有死。渙而復之。亦必有道。著其思以立其誠。焘蕩悽愴。沒世而不忘。故立廟之制。親盡而祧。祧而壇壝。其愈遠者。情不得而推也。自唐以來。祖立先聖廟。天下郡縣。皆以上丁致祭。升降迎享。有似夫宗廟。而復琢範土木。象其神明。故其廟也。有堂無廂。重屋四阿。具體而制簡。禮緣人情。敬生於其心。其從來也久。則今之爲廟者。不得而廢矣。夫子嘗曰。祭神如神在。神無在不。有其誠。斯知神矣。獻州交河縣。舊有廟學。廟狹庫不足。展事。皇慶元年。王君某爲縣主簿。治事之隙。日率胥徒入學。以受講。乃與其令長僚屬。勸士民出其贏財。廣新孔子廟。越明年十月告成。維昔獻王纂輯古文。補正六藝。今州以是得名。儒術之士。宜爲歌詩以侈厥美。於是鄉大夫刑部員外郎葉蘇君俾志經始。且請之以詩。詩曰。

兩河舒舒。民迄奠居。理政執先。學廡是圖。禮殿弗虔。墉棟庫穿。我究我環。築營操堅。嗟爾士子。康色以喜。出粟載車。以相胥宇。松柏璧石。維鐵丹碧。翼然崇崇。聿完有值。王君之始。民不知至。暨來糾成。其徒烝烝。

仰止獻德。胙土啟國。絕續闡微。維聖是則。聖有載籍。德脩靡忒。毋辨以夸。毋質而阿。洋洋在庭。若聞厥聲。視而新宮。以淑以繩。

獻州交河縣三皇廟碑

司馬氏作史記。斷自五帝。世之言三皇者。著天地人之說而強名之。孔安國序書。以伏羲神農黃帝爲三皇。或者疑焉。晉皇甫謐述帝王世紀。謂八卦之畫。切於人身。水火升降。得以有象。百病之理。得以有類。神農黃帝設五穀藥石。爲生民本。謐之論是。殆謂醫家者流而專言之也。唐天寶禮官定議。尊古帝。祀三皇。適與謐合。皇元啟運。詔天下郡縣立醫學。因奉三皇以廟。春秋謹祠之。昔人有言曰。庖犧神農。順民之性。育之者也。黃帝除民之害。救之者也。乾坤之道。合變以成。民用之而不知。象而示之。凡所以各得其正者也。誠在中矣。宮居粒食。順形色之正。將以養而安之。忘其和平。基其所之。疾疢生焉。博施濟衆。堯舜猶不能以全其功。則夫三聖人者。法施於人。而祀之誠宜也。皇慶元年。保定王君來主交河縣簿。三月朔日。有事于三皇。敝垣蕪壇。虛位望祀。拜伏瞬息。而禮以成告。顧瞻惕若。謀於令長。語于若屬。曰。象設弗嚴。其何以肅衆。神道設教。其會通之道也。乃卽其攸廣而崇之。削荒黜幽。禮璧嚴密。資鳩於民。役成於工。相胥以勸。而莫知其勞。爲錮三萬有贏。其用之不給者。悉輔而足之。明年殿成。三聖嶽嶽。有嚴有飭。遂落而祀之。維我世祖皇帝。神武不殺。混合寰宇。憂民之不全其天。崇祀廣法。俾尊其道術。幸已厚矣。不幸或罹于非辜。此誠牧民者之責。餘何咎焉。民有輿言。交河之政。有匿其婦而誣其姑者。維我王君。迹而推之。婦姑以

完盜。狙攻劫吏隱之使緩。王君之至。越境斯得。嗟夫。六氣之流行。壽夭不齊。上之人尤惓惓然拯閱之。而不至陷而攘之。則其爲疾疹災旱者。吾不知其何心也。王君爲政若是。摘職在太史。紀成字而附書之。

奉化州三皇廟碑

馬侯爲州急先崇儒。建尊經閣成。作而曰。學無田。曷足養士。表圭田租。勵之。於是鄉之儒合言。茲實吾黨。取鄉校日毀。青衿賦焉。館粲有加。士子知教。盍助田以成侯志。侯復曰。先賢遺則。惠養存歿。規曷敢湮廢。正籍端本。恥格貪戢。於是始言曰。噫。世祖皇帝行仁肇邦。萬世永憲。今獲守茲土。疾疹不治。黎民何辜。乃建三皇殿。初殿在廢觀址。後徙寺旁。庫隘弗稱。詢圖考初。厥地爽亢。遂廣土而興之。百柱翼成。萬瓦鱗比。厚者效泉。力者輸役。官不出賦。而巋然光尊。耆老贊企。願紀其建立。以彰侯績。抑嘗聞庖犧闡極。人居其中。靈根湛純。萬化是生。坎離致用。窮夫陰陽之機。壽夭不齊。彼實戕竊。維大聖憂之。樹藝五穀。輔之以醫藥。剛柔燥溼。各施諸用。神農之功也。因其厚生。迄於傷生。以憫以原。爲之經問。教之以知懼。使各盡性命之道。則夫黃帝之功。詎少矣哉。三聖炳著。尊祀肇唐。皇甫謐之論。合於醫說。道不虛矣。爲作樂章。俾歌以祀。表侯於無窮。侯名驥德。字致遠。官奉議大夫。明爽幹飭。吏民畏而愛焉。是役也。州之官咸佐之。鄉老皇甫簡董役。訖成。前門九楹。廊廡齋序二十八楹。講堂五楹。禮器備充。圍繚丹堊。咸曰美哉。歌曰。判鴻濛。精一中。八方圓。握以通。稽聖作。逆不逢。神之游。雲霓從。嗟彭殤。曷恣縱。簡差差。指厥蹤。玄籥啟。人喬松。煌煌大聖萬世功。

天昭昭日月。星變化。周純粹精。木石土金。盪至靈。飛走食物。各受令。一日屢蘇。民乃脩齡。覽九州。雲泠泠。是州秀淑。守著能。牲具肥。酒齊馨。

日出作。晦宴息。守厥故常。民用不極。何顛債自傷。縱恣作慝。帝有憂。筆載籍。目視毫釐。脈寸尺。智者驚。保厥德。雲龍之髯。杳無跡。祀靡數。千萬億。

衢州重修三皇廟碑

混沌既判。民生之用。日滋。制器創物。首於三聖。詳見於宜尼之繫易。儒者皓首。焚莫能以究。周外史掌三皇書。秦厄既盡。而其遺言。間見於諸子。可得而考者。唯醫家者流。見之天經。時訓。書禮之準也。察其循環。考其氣運。不悉。不足以言醫之本也。至於推萬化之原。別九州之宜。調神裔精。按摩導引。湯液炮炙。無一不究。地利土膏。率有合於農書之說。若是者。其繁且難。有甚於吾儒。則凡爲醫者。良不易言也。小司馬作三皇本紀。其精約。不出於大傳。而荒誕不稽。悉得以警病。史遷之不作。良有以也。伏羲神農之書。見於易。黃帝書。具在有依。髣而爲之者。亦不失本旨。自唐肇建三皇祠。世祖皇帝。遵舊令。遍祠州郡。推仁濟衆。比合前聖。泰定元年。夏三衢郡侯赫斯。趙侯仲禮。僉曰。天子神聖不殺。稱上意。俾洽于羣生。莫若立醫學。於是與府判官定住君。勸糾于其徒。爭輸幣以助。不三月。殿以成告。繪象有嚴。禮器畢具。惠民有廬。校官有居。闕明。廉訪副使真定白侯鐸。拜謁廟學。首肯口贊。且割官沙田爲畝若干。以奉時祭。咸願刻石。以著永遠。繫以詩曰。

太素網緼。品物類分。經緯五行。濟用立動。茫茫開元。通幽合神。炳諸典墳。是究是勤。盪摩三光。區別九土。沮洳晦冥。或折或沮。潤澤滲漉。順而居處。正陽昭晰。以保純嘏。有簡斯彰。翫覈纂組。民用不知。其仁如天。大帝述明。播于垓埏。春臺以登。鴻澤日宣。嘉穗合畝。采鱗游川。俾絕癘疵。享其大年。三衢之宮。伊侯所築。濟濟者徒。惕若奉玉。研精韋編。以介蓋穀。侯云去矣。祝彼千祿。我庸作詩。相祀是肅。

饒州安仁縣柳侯廟碑

古昔祈報之禮。得行於州黨閭里。民神相通。禦捍於無形。厥有常祀。一有水旱疾癘。爲其所憑依者。尤倬然偉著。五行之精。成於太素。摩盪鞳轆。主宰以名。國有典禮。莫得而僭。維神依人以行。實有姓字。烈山氏之柱。共工之句龍。周之先后稷。死爲其主。後又擇其功德之高者。代而承之。噫。積虛以爲氣。氣散以爲變。居陰假陽。人鬼之化行。則凡今之列于祀典者。皆本于是。皇朝列聖。下制詔以通幽潛。遺德著功。表見郡國。雖數千百年。皆尊顯崇祀。至大二年。崇文弘道。玄德真人吳全節。蒙被殊遇。推榮其親。退伏自念。昔爲孩提。黨禁族醜。從我父兄。觴而祝之。繫神是賴。神之闡微。肇唐咸通。至宋宣和以來。由侯以王。胥蟻休嘉。鄉大夫湯巾炳志于祠下矣。今歲時阜康。神靈熙熙。祥風甘雨。莫窮其微。犬牙接壤。咸稱神效。願上其事于禮部。全節敢稽首集賢。敷奏天子。以昭神惠。秋七月。武宗皇帝御朝。封顯靈溥惠冲祐真君。命詞臣宣制而褒錫之。是歲真人歸至安仁縣。以制書授神及饒國公饒國夫人。吏士再拜。吳氏長幼亦再拜。禮成還。風交雷挾。雨來應。安仁之人或言曰。明有禮樂。幽有鬼神。孝以揚之。誠以昭之。茲邑之美。一舉而兼備。

孝生於心。神之相之。孰使之然哉。縣長吏將刻神制書于祠。真人屬爲記。按舊記。真君姓柳。名敬德。乃爲作迎享送神詞三章。以廣民思。詞曰。

結玄雲兮文虬。的容與兮山椒。光晶熒兮橫流。帝鼓導兮前驅。山之阿兮神居。迎羣睇兮與留。儼素容兮絜貞。佩冷音兮始停。

筍席兮翠遺。棘七兮紫搖。露零零兮隕珠。嘉薦湛兮以陶。揮上牲兮吸秀芝。巫揚廷兮靈之媿。靈媿兮心降。日簡兮益康。

日懸車兮松冥。千童慘兮控駢。鼓坎坎兮輪砰。恍欲去兮心不寧。神居兮山承。宇汝居兮山下。神詎去兮愁汝。執玄德兮歷九疑。超無爲兮終焉以歸。

徐州呂梁神廟碑

神禹水功。龍門呂梁。惟最艱。聖人述書。隱而不言。懼荒怪以汨真也。步于上帝。受圖于河。其事偉著。豈誣也哉。余宦京師。過今呂梁者焉。春水盛壯。湍石瀾漫。不復辨。左迴右激。舟檣林立。擊鼓集壯稚。循崖側足。負纆相進挽。又募習水者。專刺櫂。水涸則巖嶠畢露。流沫懸水。轉爲回淵。束爲飛泉。頃刻不謹。敗露立見。故凡舟至是。必禱于神。神固靈矣。夫集誠以致神。靈由衆成。往之自信。不惑者。猶感悼自恐。則今之所謂祿利奔走而不息。寧得無慊于其中也邪。昔世祖皇帝征南絕淮。夢神扈蹕以行。昭所至立護國祠。呂梁故祠相傳歲已久。此邦之人。因其濫險。復增重之。由是南北之舟。至于祠下。必禱焉。彭城隸歸德。太守因

君以事謁祠下。肅瞻有加。乃命立石。以侈神績。於是鄉之耆老鄭安仁。復廣其廟基。象設密嚴。棟宇軒觀。薦醑登降。嚴飭有秩。遂介總管錢塘姚君。具圖狀。願刻其事于石。余待罪太史。觀前代職方神祠。徐州有廟曰孚濟。曰顯濟。皆曰龍神呂梁。信天下奇險處也。非神孰尸。非龍孰居。嶽瀆祠不以姓氏著。呂梁爲河下流。奔赴南海。一息千里。昔之神受令神禹。顯微無常。代謝上下。隨運以化。則今之神猶古之神也。皇朝一四海。貫輸金珠綺縉犀象水土精翫之物。悉出東南。舳艫相銜。晝夜不絕。道必由徐州神司其職。訖罔敢替息。依神以行。相戒無虞。神任匪輕矣。乃作詩曰。

首河崑崙厥行靡恆。或伏而舒。或迅以凌。在昔堯帝。孟門震騰。授禹以圖。百神罔不承。九野旣疏。沈水渾渾。挾河以行。北東斯奔。積鐵懸壁。怒雷赴川。如雷斯注。如蛟斯騫。自涯刊山。訖達其源。河旣南矣。帝迹眇漫。赫赫世祖。威神耀天。爰率賁琛。萬桅盤旋。引梯從繩。以登以升。鼙歌稚和。鼗鼓受聽。權夫佐前。水師試命。曰吾神是依。捨神則病。駢駢士子。亦有商女。爰集宇下。醴酒致祀。金龍蜿蜒。以肖起止。導其棘流。如席如砥。此邦之人。仰神之來。昂昂石松。雲旂離離。匪惟護之。將永綏之。山川出雲。古言祠之。崇堂豐塔。耆老相字。戒而叫囂。毋作神侮。拾級有敘。勿黷貨以沮。神告萬年。天子受祐。

奉化州開河碑

奉化諸溪。至龍潭畢會。汪洋衍匯。陂塘澗溝。合流赴資國。紆行凡六十里。始達于江。歲霖雨不時。溪江相迎。上下交射。漫流田堤。或漂民廬舍。昔之爲政者懼焉。於是築埭善坊。潦至則泄。旱則瀦。以灌輸。由資國

埭注市橋。循三山爲廣平湖。凡言湖通吠澮也。湖之下有斗門。必嚴其水。則至是通鄭家淫。古有陰溝。或爲淫溝。皆取以達水。今言淫。名之省。聲之訛也。溪至是循明山。稍折爲揚橋。水以折始善。行將達江。復限之爲縣門。曰進林。曰常浦。又益限之以埭。曰車者。提闕有程。則水旱不病。今之善吏治者。擊擊奉公。上不保。政不能及此。廣平馬侯驥德至州。曰。皇元陞江南縣爲州。實祖戶口。戶繁租瘠。何以稱綏惠。田疇蕪闕。茲惟殿最首。吾視茲土。抑溝洫漫滅。以害吾民邪。遂窮上源。首資國者老咸言。市橋達車者。有故河往。宋舟楫聯絡。今趨江以行。驚駭濤浪。商賈不赴。而市用益匱。濬廣復舊。則民其有瘳。遂遵市橋至陳橋。具畚鍤。表深廣。未及終日。而遺石斷絕。皆舊蹟儼著。至何家埭。或曰是郡乘不登。積爲豪民利。水至是當行。何障固焉。於是決隄。仆石。埭復置。卒守水門亦如之。易資國埭爲水門。別立小柵。以謹通塞。廣平增斗門。志舊有贍卒。租亦復之。於是昔之言紆行六十里。皆得舟行以達于江矣。史遷作河渠書。能吏所紀。塵一二數。謝太傅守淮南。水利博濟。則自方之以召伯。謝公偉功。迄不廢。馬侯之政良近矣。乃係以詩。俾勿墜。

詩曰。

閔閔汗萊。舉趾厥艱。婦鮪子任。火墾水芟。相彼高下。粵昔廡蕃。有限相之。有泉養之。崩奔交來。設險以防。彼防弗亟。時其雨暘。謀于在野。集作會節。低昂疏儲。究爾墜遇。鑿強恣專。訖孰俾是。罰馬侯自南。宣承皇風。相攸以圖。鞠草茂豐。耆艾交謁。茲焉商功。千鍤剖壤。頽堤赴壑。宛其遺基。白石鑿鑿。復常彌堅。匪夸以丕作。泉流湯湯。陰洩陽瀦。江流馬奔。懼而舒徐。千帆縈紆。入于市區。河旣復址。侯斯戾止。嘉穀羨穰。甘棠

藥。維河之新。告來者勿替。

碑陰

凡大工役必資僚屬。長官某。同知某。判官某。吏目某。實僉贊之。州民之耆長。大家某等。歷考舊蹟。且佐厥役。吏奉令曰。某等董工庀程。州之南復有梁家灘。曰曰碑。成家溪。悉濬治之。足溉田萬畝。開河績最著。庸附碑右。以見侯政。小者亦若是。

許州衡君去思碑

至元初。詔議立五事。爲牧民根本。後數歲。憂其有不奉行者。輒總覈敦厲。又時遣重臣循行。以振植之。大德七年。分命宣撫使糾嚴黜陟。多罷所居官。獨未聞有治行第一。入徵爲謀議。邇臣者。使者以功狀上丞相府。府下東曹掾。掾守法。謂事任固當是。束狀入書。度不復省。由是註墨抵眚。歲率常書于憲部。夫法不足以成政。先王馭臣。必先之以序爵。其不幸而奪廢之者。誠不忍於人也。民爲天下本。郡縣守令。常長於民。民病其長。歲有所黜。率天下之民。常不善其長。民獨何心哉。余每過通邑大府。碑首高下。表植衢道。讀其行事。無一不皆古循吏。而焯焯在人耳目。又若相反。甚者謂懼其威使。而以媚夫人之爲也。俗媮而日艱。濟之以淺薄之論。上益以不信。則是守令考課。蹈規襲常。安所從超越哉。皇慶癸丑秋七月。天子遣御史分察天下牧民賢否。咸屏息俟命。國子助教許昌趙君師顏言。衡大夫氏守許賢。解官三年矣。其承大夫者亦已去。過時而政存。可以登紀。子職在太史。不溢美。不希諂。宜表石以昭永。毋固辭。桷謝不敢。則又

曰。余叔父廉訪公師表河南。置論少許可。言大夫賢無異語。誠不憚書衡大夫事。第以州里嫌。故遂雅屬子。桷始謝不辭。於是退以其郡士劉君廷瑞者。長郝守寧之狀。摭而敘曰。大夫爲州。質靜無亢異。視民便害。默計而成除之。州賦戶二百。歲久亡絕。無所徵別。輸他民以道責。民莫敢訴。許爲要衝。遞馬戶率多逃去。竟三歲。以民籍戶四十二代之。戶代而民籍。徭調如故。大夫請于官而悉除之。厚風俗。敦尙孝讓。考漢魏塚墓。若陳太丘而下。立鄉賢堂以祀于學。復構廊宇以庥諸生。而使之竟業。臨潁縣有鄧艾口故地。河南檄大夫按視。將屯之。大夫署筆曰。鄧艾故屯。由魏下千餘歲。未嘗復。今有民若干。耕其地。墳壟居室。環地左右。一旦官墾闢。大不便。願俾民以已耕田歲入官賦。猶屯田也。河南是其議。民往謝之。大夫曰。吾職也。何謝爲。今世揭揭然以商權爲仕進路。使大夫廣屯穀名。得十萬石。顯要可立致。不忍數百民命爲僮。許人之思大夫。宜社而祝之。相與望其儀于天朝。以德我許人者。日永久。乃繫之以詩。以篤不忘。大夫名佐。字君用。廣平人。詩曰。

瞻彼具茨。英英其雲。不稷不徐。粵維邦君。邦君之來。我民不聞。曰秋而嘗。曰春而耘。木之龍捲。維侯之宅。侯轡在掌。言戾于學。有挈有任。亦卯其角。亦飲其醕。言攷耆髦。潁川之流。其下黍稌。嗟余遠祖。及我鯨寡。是播是藪。曷余敢震悔。潁水之涓。戢戢其牛。利言鼓簧。將復其陂。陂云當復。云誰之來。邦君痛痛。維衡大夫。大夫言邁。匪愠斯怒。有輦者居。有墳者墓。咎匪我執。言遵其所。陂旣完矣。大夫旋矣。熟而豚肩。進其粢矣。曰我不敢嘗。爾歸爾鄉。墓門之柏。烏飛彭彭。中田之廡。椅桐棣棣。云昔不如今。永歌以康。侯歸其組。三

載云遠許民之思。復日以旦。侯車在東。彼從如龍。侯車偃里。誰爲之朋。有弁斯綏。大庭團團。瘁躬在公。匪食其殮。式昭去思。攻珉以鑑。嗣初維終。懷永我傳。

華嚴寺碑

太祖皇帝肇定區夏。視居庸以北爲內地。戶族散處。皆安其簡易。在憲宗皇帝時。將有事西南。底慎舊章。建置靡遑。時則世祖皇帝治軍和林。相厥地利。曰維灤陽。展親會朝。茲爲道里得中。稽衆契龜。僉告允吉。因城而名之曰開平焉。歲在庚申。世祖承大曆服。建國改元。削僭靖亂。宗王殊邦。奉貢效牽。咸會同于開平。由是定爲上都。大興爲大都。兩京之制。協於古昔矣。省方有常。庶職攸敘。商旅子來。置而勿征。首建廟學。乾良二隅。立二佛寺。曰乾元。曰龍光華嚴。復立老子宮於東西。化俗警蒙。相須以成。具訓淵遠。將垂憲永。以爲民則。仁宗皇帝在東宮。如華嚴。惕然永思。粵維皇祖。置慮弘廓。建都功業。弗克崇闡。紹開是我子孫。不大彰顯。爰命守臣。臣某。撤而廣之。踰十年。將成。仁宗陟方。繼天體道。敬文仁武。大昭孝皇帝。北巡狩。回上都。首幸華嚴。若曰。列聖在天。神化合一。朕罔敢有替。述修聖明。將於是。有在。廣植冥福。神御周流。宜得以屆止。其以先帝所構殿鎮于後。維五方佛像。在世祖時。素有感異。復廣大殿以居之。梵相東西。挾翼以從。凡尊事棲息。悉如其教以備。又別賜吳田百頃。安食其衆。至治三年夏六月丁卯。丞相入宿衛。上都留守司同知臣某。傳旨命翰林宜爲碑紀其成績。俾萬姓蒙祉。庶得以昭朕奉思。臣竊竊以爲天地生物。無心以成。維聖人有憂。則曰物有不齊。皇極是訓。大雄氏則亦曰。性本至善。遷以隨欲。欲由妄生。性日益

昏故爲物爲變。至於摩盪。釋羈。生死靡分。於是有懺解之說焉。有追崇之說焉。使生得以斷。死得以離。則本性湛空。無有垢累。道奚病矣。華嚴設辭。以富貴爲喻。終之以返真復初。俾世之所景慕。由境以入。因境而悟。入於無相。其於喻也。深有旨矣。世祖命名。亦將以警夫迷俗。愍濟羣動。與前聖相合者。實在是。聖聖繼承。靡有銖異。臣桷屢從屬車。聞首主是山者。曰至溫師。以妙密縝綴爲本。行傳宗洞山。與太保劉文貞公乘忠爲方外交。磊落有大計。因得見世祖於潛邸。陳對明朗。遂大器之。六傳曰。惟壽。今授司徒。際遇隆赫。於法祖有光。壽能文辭。守其道專固。則永以傳。謹再拜稽首。爲之銘曰。


於赫世祖。武緯文經。廣莫相攸。堅壙斯城。鑒觀羣生。厥性有恆。驕鷲忿鬪。失常是行。沈昵昏惑。執妄是成。維政與德。具訓以儆。善本性初。爲明爲靜。猗與覺皇。功始戒定。或喻以空。或設以境。空解境悟。真慧永證。巍煌華嚴。窮珍極瑰。龍伏藻井。雲凝瑤臺。積香浮浮。側瓴枚枚。耄稚畢觀。心掉膽摧。相旣永離。虛空如埃。世祖稽古。是則是效。暨于仁皇。益闡乘教。維皇御極。承志廣孝。曰列聖在天。鴻績靡報。顧瞻咨嗟。展飾殊妙。錫福兆民。列聖之心。拯彼大迷。覺皇具陳。謨烈顯承。如歲之春。物無疵疢。齊熙沐淳。億萬卜年。刻銘堅珉。

興福頭陀院碑

興福院在都城保大坊北。院旣成。其主僧尼捨塵。以其狀來謁曰。捨塵王姓。膠州卽墨人也。家世素奉佛。今之言佛教有三。禪以喻空。教以顯實。律則攝其威儀。禁妄絕非。鼎立以陳。融會莫究。惟頭陀教。吾佛宜

演形色自然。汨其紛華。而悲惱集焉。外守或懈。內持益離。參而範之。將釋諸塵。以成安樂。若是者誠有端緒矣。教始於西竺。盛於齊梁。皇元建國。今其教凡十傳。捨塵始與其徒劉普照。誓志游京師。刻意問道。日唯一食。精嚴自牧。以勞役爲調伏。非薄爲精進。草茨安寄。束身堅忍。至元中。今平章政事王公毅。樞密副使吳公珪。福建宣慰使李公果。見而異之。始買今院地。至大德□年。平章政事賈公某。邇院居。審捨塵積行無退意。遂與其夫人林氏引見于皇后。下教出財帛。建其殿曰慈尊。俾開府知院月魯公暨賈公。奏其事於皇帝。皇太后咸曰可。其悉以皇后私府輸助之。延祐五年。院告成。復奉宸旨禁護。而掌其教者。錫名清修。妙行以褒美之。是役也。齋庖廡室。皆捨塵所鳩建。嘗謂釋氏之說。福田利益。姑警誘盲駭。若曰離愛辭榮。非感物而動者也。真性虛湛。奚假於外。則其說近矣。詞曰。

粵昔能仁。蟬蛻侈華。細縑泰始。雪霜勵磨。厥性眇微。五采眩訶。毀形壞衣。其饑不頗。空假廣陳。蕩恣斯病。佩規帶衡。迄莫內省。茲惟艱哉。爰參以竟。憊由樂積。煩以欲聘。除彼垢紛。曰執中無競。女德效坤。靜於鴻濛。維大雄是師。頭陀是宗。人憫厥勞。熙然以充。善士日來。格于羣公。三宮清穆。昭事孔肅。鑒觀字縣。作極錫福。夸榮逐魂。是究是度。秉持法權。俾民不顛。伊教之興。泊然續承。千甃固室。百礎拱楹。式尊其初。匪維誕矜。戒爾後人。戰兢永寧。



清容居士集卷第二十六

神道碑銘

武義將軍梁公神道碑銘

梁公諱禎。字用之。大名元城人。父金吾公千。爲大名兵馬都總管。旣卒。長子汴襲職。會用兵江南。復籍新軍。別擇將家子統領。中書樞密二府議以汴兼領。公憫然曰。兵事至重。寧能使吾兄獨受責邪。禎宜行。死國效命弗辭也。二府壯之。攝授以新軍千夫長。俾鎮睢州。帥領兵將渡河攻宋。宋將夏貴迎拒。遂領所部分擊。斬首若干級。帥上功狀。拜爲眞。中統三年。李璫叛。攝本軍帥。出擊功益最。璫受擒。方璫叛山東時。調發旁午。璫善戰。故將士多失亡。璫受誅。軍帥俱恨之。議悉屠其黨。公密白宗王哈必赤曰。璫逆黨非土著。俱東南狂士。宜汰擇以安新土。宗王然其言。從攻襄樊。功益著。加授武略將軍。至元十一年。鎮邳州。十三年。王師渡江。州郡望風下。常州獨守。世祖皇帝命大帥率堅銳併圍之。州嬰守益固。有將築橋登城。城弩中將死。檄公代將。卽輦木石濟城。雉剗其險。塹緣附以登。城陷。第功授武義將軍。佩金符。後改鎮嘉興。羣盜出沒江湖。伺疑釁竊發。獨展誠撫綏。申令飭罰。使不能少越繩墨。會歲大饑。捐己儲粟以食餓者。郡益寧靜。性沈默。善計事。天性孝友。出於自然。始公之考金吾衛上將軍。當金亡時。傍邑盜起。侵掠。金吾率衆列柵守鄉土。天兵南下。越境率父老持牛酒犒師。城以降得完。宋將彭斌渡河。城中大震。搜其首亂者誅。

之辛卯歲郡將蘇椿叛入南大將阿朮魯怒將屠城金吾率宗人悉輸金帛詣軍前請命卒獲免公之妣張氏訓整有則金吾以兵亂失元配董氏踰二十年董氏還夫人即歸家政退處裕如也噫觀公卓然成就蓋其家教有自再世樹德傾身出口活人於大難其豐報蓋有以也王父而上兵難事遠不獲考至元三十年年未七十願解兵致其事大德元年正月某日卒于里舍年七十有一其年四月某日葬附大名府西南白水村之先塋娶張氏大名織染局提舉津之女子紹祖襲爵佩金符仍鎮嘉興嚴重遠慮鎮遏褻隱悉不使入境後鎮烏江詢盜蹤跡在海浦遣兵擒磔之郡鎮肅然延祐四年年六十終于軍四月某日祈先塋公女二人長適李居忠温州路照磨次適張鉉澹州判官紹祖娶天水郡侯秦穩女生子女各一人曰成襲祖職佩金符娶大名府安撫使宋天祐女女嫁承直郎佩金符潁州萬戶府管軍千戶劉興輿之父中順君今爲雲南屯田萬戶府同知栢輿之游最稔善議論嘗言昔時離亂大名城中幾駢首就死獨賴梁金吾得全活空郊敗井隱然鋒鏑遺跡猶在厥今梁公子孫世顯抑爲善之報善有傳往史良不誣也輿以事狀來請銘乃不復辭銘曰

草昧肇區。雷雨風驅。崩角喪元。孰完厥居。業業單壘。斧鋌就屠。壯哉金吾。請命發途。稽顙灑血。氣填以歎。春冰朗日。稚毫夾扶。或偃或興。聚其室廬。是生武義。趾繼以繼。粵維叛臣。率黨狂獠。交兵飛駕。靡有寧歲。旣殲彼魁。乃徒斯薙。武義曰吁。罪有等第。宜磔其兇。此土何戾。再世興仁。陰功齋齋。如璞斯玉。如山斯雲。大田多豐。曷籽曷耘。番番餘齡。終樂里紛。靖共以儀。不瑕以溫。金符後先。祖曾子孫。白水之域。松柏茂直。

爲艱斯通。爰表初植。大名之城。大蓋日隔。永言金吾。曷其有極。煌煌譜宗。接佩踵烏。有來墓門。肅立以式。公德允昭。後裔承則。

資善大夫資國院使贈資政大夫江浙等處行中書省左丞上護軍順義郡公諡貞惠玉呂伯里公
神道碑銘 并序

至元二十九年。世祖皇帝詔立肅政廉訪司。監治諸郡。濟南陳公□□。實治慶元。按覈官吏大小餘百人。故工部尙書資國院使順義郡公。時爲治中。獨受委任。條其不便於民者。上府力去之。會大饑。乘驛詣行省。言慶元瀕海。地陜隘。歲熟猶仰給他郡。非官賑給。將移徙不便。執政然其言。爲發粟石四萬。後爲廉訪副使。復治慶元。遺愛炳著。耄稚一口。迄稱敍不置。大德中。桷備員翰苑屬。時公爲侍從。每得奉議論。必歷問衣冠緒族。惓惓於舊治彌厚。公薨將十年。其子和上以儒雅善正論。擢監察御史。桷亦待罪集賢。相與言公遺事。御史則曰。子實知吾先公爲詳。且神道之碑未樹。子宜爲銘。桷謝不得辭。遂次其官闕世譜而爲敍曰。公系出玉呂伯里氏。諱伯行。大父阿魯。家西北部。世安其俗。精騎射。父忽都。勇冠軍伍。天兵定中原。因從征。冒陣略地。以積功領南宿州軍。分鎮斬縣。後家于大名路之清豐縣焉。公幼歲失斬縣。母夫人徐氏。躬牧蒔。紉織以贍。稍長。命從學里中。張蔡公尹大名。見而奇之。後從丞相阿朮公征襄樊。南渡江。率先登。復從丞相阿答海鎮揚州。議以州所領四萬戶軍移鎮鄂。而易鄂兩萬戶軍更戍於揚。奏已準。白於鄂省丞相阿里海牙。使者相望。訖不肯發軍。淮省丞相念非公不能辦。卽乘驛宣上旨。語竟。鄂相色赤反。

目。公前曰。丞相何怒。受上旨怒。怒且不敬。丞相懼。答曰。吾怒阿答海。公復前曰。上旨非淮相所造。公怒。殆怒上。願亟歸。相益懼。具酒食謝悔。乃發軍。丞相奇之。錄其勞。以通國語專奏對。歲率乘驛六七返。世祖見而喜曰。是黑髻使臣復來矣。至元二十二年。授承事郎。調金壇縣長。省執政官計慮江浙事繁夥。非條達敷對。莫能稱上意。時征日本事不便。念所使有詰難。必忤旨。遂選公驛奏。至。即罷兵。遷承直郎。行省理問官。省中事急速。必命公詣御前。皆得允旨。以歸。世祖曰。伯行昔朕以黑髻使臣目之。今察其相貌。誠溫暖。絜正。俾以重任。宜無負。相桑哥方柄政。寢命不下。即再守舊職。丞相移省江西。征獠寇。奏公自輔。授奉議大夫。行省都鎮撫。二十九年。授慶元路治中。慶元多故。宋公相家。時翰林學士王公應麟閉門不納客。公首尊禮。開說。俾學者師事之。里胥躡蹠士族。著片紙叱名立召。庭下公責吏數罪。俾書故官。吏復聚謀。行權酷法。壞富室釀具。當益官利三倍。公毀其牘不行。州民某氏某。以事遁江淮間。傳王旨起大家十餘姓。徙置淮南。傲睨指畫。莫敢忤。郡貳南士也。益張大翕霍。公察其姦利曰。民籍始定。上計此非。淮南分地曷得徙。願上省白事。卒止之。承接聲影。纍纍蚩氓。爭願出其門下。會僞造印牒事敗。大興路獲得其所署僞籍。下郡逮捕。公時再爲理問。羣氓造庭。叩首伏罪。公憫緩其事。卒得贖。大德元年。遷浙東海右道肅政廉訪副使。復分治慶元縣。有廢湖。總戎官久據。湮爲田。將輸官租。以絕口。公立決。以溉民田。撫循瘡痍。磨刮驕冗者。素所習知。而獨於鄉校諄切訓諭。謂爲宣化所宜急。至今蓋有賴焉。同分治官。蹶弛日。事事爭上。謁出入無禁。公手疏力按之。太傅丞相答刺罕公。審察賢士。擢工部侍郎。日從丞相騎。具言江南弊事。

數百條。丞相首肯之。且命治西京賈人積逋鉅萬。待其實。大德八年。成宗召對。賜侍宴襲衣。十一年。成宗崩。丞相受遺。鎮遏嚴整。獨命公掌諸庫藏。鍵鑰唯謹。諸王會朝。頒賚有等。目公品節。纖粟毋敢譁。丞相益器之。遂陞尙書。至大元年。今上皇帝時爲皇太子。以本部官見問。今何階官。再拜謝不敢。遂加正議大夫。俸稱其職。值營繕。推佛寺恩。賞悉謝不受。從皇太子如五臺山。頓遞如法。而不病於民。賜白金名馬。以寵之。太夫人喪。某年乞歸里。特賜上尊。俾祭于墓。仍疾趣還朝。以視事。省更尙書。授兩浙都轉運使。力丐辭。再授資善大夫。資國院使。復辭不允。三年。奉旨過江南。具條所行事宜。卽得疾。臥寓舍。四年三月己卯。薨。年六十。有一公平。居簡默。絕聲色。謙抑自闕。遇事有發。發卽不可犯。崇善斥惡。若飢渴。峩冠深衣。于于庭廡。曲盡恩意。所至率招師訓諸子。御史之教。寔有自來。晚自號德齋。延祐四年。特贈資政大夫。江浙等處行中書省左丞。上護軍。順義郡公。諡貞惠。娶曲律氏。嚴整內治。一不累公。故所居官益自裕。今封順義郡夫人。男四。長卽御史。次貌罕真。習儒業。以門功讓其季。曰教化。今爲武略將軍。同知沔陽府事。女一。適衡山奴。江西廉訪司僉事。孫男聖童。銅臺清涼山。孫女二。長適太傅鐵哥。孫伯顏直省舍人。次適駙馬丞相亦都護。朶兒赤。長子南無釋迦。以是年八月甲申葬。公魏縣。乃爲銘。銘曰。伊涼之西。沈鷲悍剛。挽強策良。樂其騰驤。天祚神聖。授兵龍荒。湊輯部族。以先顏行。赳赳赴功。星流電驅。顯允宿州。飛矢執父。裹瘡先登。擐甲以趨。履彼樂土。籍魏奠居。篤生尙書。積學以蘊。力探其本。游於鄉校。不伎不忿。展武誓身。江流渾渾。踏襄擣樊。舟濟合盾。計其功多。司譯省中。敷奏簡亮。走驛歲終。黑髯長身。

儀動帝瞳。罷征除衛。音詞鴻鐘。靡忒其行。弗矜以辭。彼權抑之。訖莫疵之。再官游歲。究覈謾欺。輕疑除蔓。納于春熙。丞相受命。捕獠西江。辟公佐戎。解甲受降。彼強先覆。輟于油幢。摩之沃之。革其愚狂。佐政海壖。恤鷩廣賑。尊而儒先。俾職具訓。曰維此土。衣冠振振。勿爲隳辱。養真復淳。儒彥在堂。父老在廡。壽母委蛇。介彼春醕。歲亦有康。絜而稊稌。去馬駢駢。執轡如雨。公復有來。爭任爭扶。悅其條教。激頑蘇枯。同列冒慮。書章劾鋤。端撥審官。俾執事樞。不諱以嚴。不激以正。庀工斯程。賞至偃命。品秩日崇。經國陳政。膏竭木萎。水涸魚病。積憂載馳。疚關我身。計其便宜。咋舌莫陳。教子惟忠。以報國恩。不夸其贏。淑施後人。魏縣之原。松柏堅貞。錫命孔熿。哀對以承。倬彼光大。維公之成。勒銘表阡。永垂厥慶。

資德大夫紹慶珍州南平沿邊宣慰使播州安撫使侍衛親軍都指揮使上護軍追贈推忠效順功臣銀青榮祿大夫平章政事柱國封播國公諡忠宣楊公神道碑銘

世祖聖德神功文武皇帝奉辭興師于宋。厥相賈某。黷復違信誓。郡將悉解體不用命。播州安撫使楊惠敏公邦憲。襲土守邊。至是十八世矣。誓于衆曰。渝合蹙隘。荊州櫛不保。宋主且已降。吾州遠王化。聞大國有聖人。當署款奉籍。俾若等著。稚完聚。果後降。汗鋒鏑。吾寧忍哉。衆稽首。一口曰。公言是。無緩。於是瀝誠。擊州。願上職方氏。世祖大悅。卽璽書慰諭曰。宋內附邊臣。莫敢後。播末奉命。宜詔諭。汝能承朕意。其悉如宋制授官。至元二十二年公薨。是生公諱漢英。字熙載。年甫五齡。母夫人田氏。攜朝于上京。眉目刻削。儀矩習如成人。上摩其頂。熟視之。諭宰臣曰。楊氏子孤弱可憫。母子遠來。宜悉以父爵錫襲之。賜名賽因不。

花公之爲仕也。授金虎符。龍虎衛上將軍。紹慶珍州南平等處沿邊宣慰使。行播州軍民安撫使。後加管軍萬戶。復拜侍衛親軍都指揮使。進資德大夫。勳上護軍。其治邊也。改南詔驛道。罷順元宣慰司。升安撫司。爲宣撫司。分定雲地。以東隸播。以西隸新部。減郡縣之冗員者若干屯丁之糧。三去其一焉。黃平素屬播。宣慰使幹羅思誘諸酋長。詐以爲新開境。獻于朝。公發其姦而歸我。使恥不勝。誣言舊有雄威忠勝軍。思播匿不以告。當籍之。交州公言納土時已隸籍爲別戶。臺審覈如公言。使益不得志。詣樞密府白其事。竟遣使者乘急傳將械公。丞相與昔審覈官言無是事。而幹羅思卒以擅掠邊民。獄具。罷歸部。蠻桑柘亂。省議用兵。公言賊勢方盛。宜招諭之。兵久無功。而卒以公議相繼請降。天兵討南詔。道由播。大發卒輦運以濟軍食。濟隆賊日熾。合鄂蜀二省重臣統師出征。檄公以民兵從。甫出師。卒與賊遇。公力急戰。大軍繼之。降阿直拔乍籠。賊復合拒。迄縛隆濟阿女以歸。大德四年。南蠻盧奔掠劫大姓。依險翳自固。黎魯在新部者。亦嘯劫蟻聚。攻守議未決。卒命公撫諭。二賊請命。遂置戍兵以歸。六年。詔出師復征蠻。命公與田茂忠率二州民兵專討之。茂忠以討他寇未至。公獨分兵五道以進。賊始卻。部蠻爭合從。公度深入絕後。應乃全師還。次黃平。七年。茂忠始來議。分民兵守險。而公以疾薨于師。年止四十。公之治郡。殺妖民。王忠以絕芽孽。大修泮宮。招蜀之名士。教厲以化夷俗。至元二十七年。詔郡縣上計。播鄰壤不奉命。公卽括戶口。租稅籍以進。上大器之。八朝京師。弓矢鞍幣之賜不絕。以平南功。特賜玉帶。兩被璽書。俾世守其土。預御宴。輒與國戚相齒。世祖嘗曰。此兒聰解。殆得天賦。仁宗則曰。此子貌沈厚。類長吾人。復賜譯經佛圖象以

寵之二相貞憲王、忠獻王、尤加器敬。性純孝，睦宗黨。二兄歿道中，請于朝而襲其爵，寬厚重然諾，嘗約以善馬贈士友，友死趣贈之。南北冠蓋相依者，無虛歲。少讀濂洛書，爲詩文，以體要爲主。所著書有明哲要覽九十卷、桃溪內外集六十二卷、幼嗜山水，九州雄勝，悉窮力以遊，別自號爲中齋。子男四：嘉貞、嘉壽、嘉祐、嘉禧。娶田氏，榮祿大夫義敏公謹賢之女，喜書史，善筆札，封遵義郡夫人。公薨之歲，秋七月，葬于桃溪祖域之東。曾祖价，宋任閣門宣贊舍人，雄威軍都統，贈威武寧武忠正軍節度使，賜廟忠顯，封威靈英烈侯。妣田氏，封齊安和政安康郡夫人。贈永寧郡夫人。祖文，宋任和州防禦使，播州沿邊安撫使。國朝贈榮祿大夫同知樞密院事，柱國封播國公，諡崇德。妣田氏，封播國夫人。諡章靖。父卽惠敏公。宋任左金吾衛上將軍，安遠軍承宣使，播州沿邊安撫使。國朝授龍虎衛上將軍，侍衛親軍都指揮使，紹慶珍州南平沿邊宣慰使，播州安撫使。累贈推忠效順功臣，銀青榮祿大夫，平章政事，柱國，封播國公。妣田氏，封播國夫人。諡貞順。至治二年秋八月，嘉貞來朝，見天子於大明殿，拜跪興，卽錫名曰延禮，卜花禮宴如故事。嘉貞昧死言曰：先臣歿有年，卹典未獲，敢以請。詔下翰林禮部太常，趣議追錫。乃贈推忠效順功臣，銀青榮祿大夫，平章政事，柱國，封播國公。諡忠宣。田氏亦封播國太夫人，而以忠宣所受官襲其子。嘉貞爲資德大夫，紹慶珍州南平等處沿邊宣慰使，行播州軍民宣撫使，播州等處管軍萬戶，侍衛親軍都指揮使。上護軍。嘉貞踵門言曰：子職在太史，植德彰善，宜以傳信。先公隧碑未立，願有述。桷謝不得辭，而爲銘曰：播唐內州，鮮于啓兵，愷彼西夷，蹂躪弗庭。虎欲澈澈，谷川震騰。乾符鼎移，五季嗣興。維并楊氏，太師肇初。

往理其疆。以黜以鋤。相繼象賢。執武靈驅。奕葉昭宣。臣宋奉圖。中令之支。踵德趾燉。再世死忠。守節彌勵。枕戈復讐。斬首以謝。燁燁展功。贊貢不替。宋社踰南。間道以前。是生忠顯。擐甲開先。三帥締歡。痛不有年。立廟錫封。歲時牲脔。由太師以降。十有四傳。崇德效奇。拯民脫危。貽于後昆。惠敏攸祗。實天有命。我弗敢違。委心效誠。世祖色怡。審彼逆順。朕不汝疵。恭承赫奕。恪事四帝。弱齡奏言。胸臆默計。宵征邁途。救敵鍛鑪。或諭以生。或矢以誓。提鄆一方。不泯世勳。盛德汙汙。如山出雲。壽齋爵穹。奚憾之云。揭碑隧門。萬子孫紹聞。

漳州路同知朝列大夫贈汴梁路同知騎都尉開封郡伯馬公神道碑銘

鳳翔府兵馬總判公諱昔里吉思。以忠節死難。廟良於治所。汴爲金南遷都。作褒忠廟。悉合享死事之臣。兵馬公預焉。兵馬贈恆州刺史鎮國上將軍。夫人王氏。太尉明德公女。方公提孤兵。字空壘。力抗不敵。盡室投巨饑。一媪抱嬰兒以逃。是爲禮部尙書諱月合。幼歲悲憤感厲。其先居天山。因以兵馬官爲馬氏。植德秉志。贖士人之爲掣者。後皆爲達官。而子孫更業儒術。卒致光顯焉。禮部子諱世昌。爲尙書省左右司郎中。傾貲粟。結雋彥。家日困落。子孫益用儒自振。是生漳州諱潤。字仲澤。父卽以文墨入官。初署荆湖道宣慰司。令史遷吉州路經歷。陞兩淮轉運司經歷。改太平路。當塗縣長官。再調常州路武進縣長官。進奉訓大夫。知光州。改漳州路同知。皇慶二年。卒於漳州。實十一月某日。年五十有九。其佐荆湖。調漕舟。討夔府。山壁夾江峻轟。樛木葛藟。率藏敵者以衝突。公上計帥府。焚伐蔽翳。取木藟。結綯索。挽舟銜尾以進。漕

事乃不缺。在吉州治，豪民絕其柄持。郡守以刻急自任，公以寬輔之。郡事不撓，有劫盜獄，株連百餘戶，閱牘讞論，止坐十餘人，守終不能以奪也。爲轉運幕，商人爭後先，歲終鹽直不售，公請刻籌第甲乙，實巨筭，俾商人自揆以抽，鹽卒以辦。縣當塗，上疏言括馬料民徙戶增賦爲不便，時柄臣桑哥力主議，公獨以邑宰能奮言之，其治武進如當塗，刑其無良者而貸假之，觴詠簡適，皆相慕以化。有拾松薪易酒，滓尉以盜論，公慰釋之。守光州，取官粟之羨者，廣第子員以食，光久而用武地。司馬丞相生于光，公歲率諸生以祠，民始知爲儒以自重。會有言利者，請籍光閒田，歲可得粟十萬石，河南省下其事，公執筆不肯署，吏固請，公曰：「官可免，筆不可署。」卒不行。州無茶租，民間採山谷微末以食，轉運司掩捕抵法，會奉使出諸道，問疾苦。公疏所以轉運生事者，各降官三資。漳州負海障崖，龍巖漳浦，數反易，公命吏宣布上意，始受令漸寧。謚會有言漳州地產水精，卒以獻言者代公，始罷當塗時，居饑，幾十年，母夫人張氏語家世官簿微警之，乃復仕。所爲詩曰：「樵隱集若干卷，觀其命名，足以知志意矣。」韋布踵門，降席倒屣，傾家治具，輟所得俸，高下賢否以奉，而其教子，晷刻不肯置，以門功讓其弟禮。長子祖常，皇慶初，桷得交于京師，其爲文詞，深湛有師法，嘗默器而期之。科舉行，祖常試汴梁南省，皆第一。於廷對，以尊國氏族爲第二。祖義，鄉貢進士。祖烈，江浙行省宣使。祖孝，與祖常同登進士第。將仕郎陳州判官祖信，國子生。試中承事郎同知冀寧路保德州事。女二，長適金雲，次適劉某。孫男五人，武子，以公蔭授將仕郎監常州路宜興州稅。文子，獻子，懿子，惠子，女孫五。祖常官翰林應奉時，請于朝，贈尙書爲正議大夫治書侍御史，諡忠懿。夫人白氏，追封梁

郡夫人公亦贈朝列大夫同知汴梁路總管府事騎都尉開封郡伯夫人楊氏追封開封郡君於是郎中之夫人張氏年八十有四矣祖常今爲翰林待制承直郎兼國史院編修官願以其封婦者回授于張夫人噫盛矣哉某年某月某甲子將葬公子光州西樊原桷辱爲文字交知且深乃來請銘銘曰節以起宗儒以紹傳誰其任之宗伯維先再世是承漳州象賢佐政慈寬智名不居養其熙光發于詩書尊聞厲行飭躬日劬載籍之蘊心聲爲言仰止不愆茲爲德源積小以高本本元元雲興崇山百穀穎粟鑒觀厥初豐報匪齎揭其德華昭銘以述

武略將軍裕州知州李公神道碑銘

太祖皇帝略定函夏以河南北要害爲分地徵科供索從守令取具版籍缺落富瘠莫能考至憲宗用兵西南調發煩重推擇宜民人者爲尤難時則有若故武略李侯排解勸勵鄉人德之死逾數十年仁聲善政歷歷在口耳在昔考循吏由身後始定今於是見之侯諱英字彥臣滑州白馬縣人弱冠襲叔父宥爵以宣武將軍知滑州立條教惇孝讓會歲饑賦入莫能輸率其州民見世祖于汴啟曰兵興值饑民卽逃亡將使此州爲空城敢昧死請世祖動色從其啓中統元年蝗食桑蠶賦病民獨建言約秋熟並取果逋負當以身任後至秋悉如約以入滑隸大名遠三百里糧餉轉輓不便侯請儲本州候遠近朝廷是其請方兵興時鎧甲糧餼率從豪民稱貸子母轉息旬月相倍豪民倚州督取復入見于上言不可陳對感切下其議執政執政咸是之由是官償其本去其倍息別爲內府籍以誌本始行田諮詢旌別勤惰如是治

滑者三十年。至元二年。改順德路判官尹清豐。南宮兩縣。二十一年。授武略將軍知裕州。二十五年。改知房州。所至以治滑爲準。而滑以久任。其事益章灼。可考不妄。嘗言叔父撫我良厚。今得以宦業自拔。卽歸其爵。兄子儀。觀脩整。酬酌庶務。靜要而理得。才不盡用。多士惜之。三十一年十月六日卒。年六十有九。娶郭氏。先一年卒。卒時年七十。學浮屠法。慈儉有度。廉密總核。允宜其家。夫人有助焉。是歲合葬于白馬縣大吳村。曾祖義。祖信。父祐。二子長元德。奉政大夫龍陽州知州。次元忠。朝列大夫慶元路治中。女四。適和義。郭君寶。馮德臨。魏仁。元德娶張氏。子二。熹。燾。蚤世。女一。適郭從道。元忠娶孫氏。子二。熙。杰。女一。適郭守中。始元德以給事東宮。授贛州判官。元忠佐御史府。授新淦州同知。公及見之。戒曰。壯歲長民。宜清謹自重。我昔罹兵艱。赤手立職業。若等展世。勿棄暴。則先德永有紹。我語弗可忘也。今二子所至。植立滑州之效。於是乎見之。桷待罪太史。預修累朝諸名臣列傳。是則滑州行事。宜有紀。謁告歸里。元忠以事狀請銘。銘曰。

粵若生民。大君長之。幅員茫茫。牧守是資。飢匪設糜。疾匪命醫。承化觀風。察其阨疵。展也李侯。百罹是逢。誅管援溺。不希其功。天聽匪高。矢言率從。不苛以夸。不阿以容。社有美楡。田有嘉穀。輿言無浮。唯侯斯祝。侯云逝矣。厥績謖謖。種德孔深。豐報有僕。白馬之原。松柏茂鮮。詢彼耄倪。遺愛是言。家教允遵。罔有虧愆。爰表銘詩。孫曾永傳。

奉政大夫同知東昌路總管府事蔡公神道碑銘

延祐年紀丙辰。仁宗皇帝推恩羣臣。考視品秩。榮其祖。及其曾大父。由是單父蔡侯衍。以簽事廉訪。贈府君諱良輔。汝弼甫。奉政大夫。同知東昌路總管府事。驍騎尉。單父縣子。妣李氏。單父縣君。泰定元年。新天子下詔。大賚內外。俾就所居官。皆錫命。蔡侯時爲慶元路總管。又贈嘉議大夫。□□路總管。上輕車都尉。□□郡侯。妣某氏。□□郡夫人。桷謁告歸里。侯以郡侯事狀來請銘。詳厥原。自則由侯之祖父總轄府君諱旺始。總轄嘗語于單父君曰。吾遠祖世居徐州。樹善不懈。吾祿弗及食。汝必有後。後果興。汝其與榮焉。單父亦嘗語于侯曰。汝祖訓語猶在耳。若兄弟仕進。皆祖德啓佑。總轄當金南遷時。限河南爲內界。禁不得渡河。歲大饑。民爭就食河北。潛戒舟夜渡。所全活不可紀。金愈迫。河南亦轉徙。皆竊據自保。郡人丁統領集衆萬人。爲宋前導。總轄往依之。署以部伍。徐說曰。宋師入汴。兵弱不可用。彼將無固志。難與共事。統領從其策。歸兵爲農。而宋將卒敗。屢以遁。所居曹州鄉曰東村。有孟氏。善居貨自厚。總轄避難。因家焉。後與孟相雄長。而卒以米帛。調其閭里之貧細。歲鬻鹽。增滲淤。算以售。市悉便之。至元十九年八月卒。年八十有三。集其姻黨與素往來者。敍遺言。端坐以逝。夫人孫氏。閱十有二日。相繼卒。治葬東村闔板塋。舊所乘馬。負衣冠以從。至塋。悲鳴躑躅。卽死。讀其行事。則單父之追命。侯兄弟騰仕之效。實總轄君啓之。單父天性明朗。其所待接。與其父率相類。官雖卑。一毫不以病民。民益宜之。家僮久役服者。毀其約。俾自便。僮不忍去。願服田以終老。年八十一。得與束帛令以卒。卒時在大德十□九月某日。夫人李氏。權某州之女。俱耐于總轄塋所。衍以臺察官入仕。其行事正不近名。去豪黜妖。愷悌以宜于民。而寬厚有度。迪祖父

遺訓復以療後興。蓋未可測也。季曰。衡口口大夫趙州尹女一。適汝上李口。孫五。冲霄敏學。山住某某。孫女三。適石定安石公安。孟欽曾孫一。奇山。梅嘗謂爲善無不報。根固膏沃。彌積以興。責成旦暮。考其所爲。不能以遠久宜矣。若蔡氏祖父。是誠可紀。銘曰。

水蹇於山。積流必東。磅礴委順。不希其逢。有截之椿。鬱兮輪困。秀儀長身。襲和服醇。匪高其門。厥慶日增。如茨之茂。如木之升。父緝子承。既壽且康。詔爾諸孫。以受簡穰。厚德匪浮。是庸紀錄。表于隧門。以闡以續。

清容居士集卷第二十七

神道碑銘

朝列大夫同僉太常禮儀院事白公神道碑銘

白於太原爲令族。至金源氏興。太原衣冠爲最盛。而白氏兄弟相繼。躋儒科。故中大夫樞密院判官兼右司郎中。輕車都尉南陽郡伯諱華。字文舉。其季也。唐宋樞密無判官。金天興帝賞器之。特置職以寵。由是相仍。自郡伯始。郡伯後居真定。生子四人。俱有詩名。君諱恪。字敬甫。少警敏。三歲善作字。書八卦八字。有以見于鄉先生元公好問。公作詩深器之。郡守上其能。將薦于朝。郡伯謝弗許。稍長。里之先進張先生耀卿愛其才。獎拔力成就。至元中。世祖遣使詣州郡試明經。生復門役。君首預選。弱冠試吏。探姦拔寃。獄具。御史不能撓。後爲河南按察司書吏。有尉卒利孀婦財。未終喪。強贅於姑家。旣而虐其婦。復不禮其姑。姑告於官。絕之。尉卒隱其罪。屢訴。終喪無明文。事久不決。君悉疏所犯。聚邑人以告。婦得終養。其姑焉。至元十四年。江南建行臺。御史大夫相威公慎簡所屬。署君爲掾史。卽條不便事。凡二十。大夫見世祖。力陳之。尤十有八。最著令者。大辟成讞。上刑部聽報可。賈某公田租歲減什二。十八年。授從仕郎江東建康道提刑按察司經歷。改荆湖占城等處行省都事。時荆湖省臣某括財恣威福。君度不可與共事。辭不拜。後果受誅。二十四年。改浙西提刑按察司經歷。遷平江。丁母羅夫人憂。以夫人喪葬于吳。將終老焉。會詔舉不

附權臣自晦者。有以君辭荆湖事薦于上。除福建宣慰司經歷。閩郡廣遠。豐歉不同。是歲汀州穀善收。戍兵所給糧不登數。福泉興化穀驟踊。有司議移三郡穀于汀。君建言道途轉輸大無益。發貴粟以賑三郡。歸直于汀。可多得穀。誠兩便。有司難之。君署記曰。使有罪。願己獨受。卒如其議。而官之贏糧果增倍。宣慰司復爲省。君治六曹文牘以俟。平章某公知君簿領有能名。受其籍以付吏。三十一年。丞相太傅公爲湖廣平章。君時爲都事。俾陳樞密院及本省利便。侍丞相入覲。有旨允其奏。復陞員外郎。湖廣聯絡左右江。官吏秩祿。歲一再受俸於省。地遠得不償旅食。有棄俸不願受者。君建議隨所部以給。迄今行之。衡永戍兵耕閒田。官出牛輸其租。牛死不得落籍。戍兵歲率餼數千萬以酬。君惻然計之曰。牛死當納皮角于官。除故籍。而以官租捐納之。則得矣。戍兵由是免害。有省臣獻廣西肥沃可爲田。徙湖南居民往耕之。當調戶五千。君力言不可。平章公是其議。奏止之。獻田者復調兵征思明。發運粟入賊境。道遠雨淖。荷擔者各持去志。君憂有他變。出直募民。民樂受以往。峽州歲饑。請粟于官。有欲核驗始發。君言饑民朝不及夕。使核驗。死當過半矣。大德二年。進本省理問官。推誠燭幽。莫有滯濫。而言論風采。彬彬文雅。蓋以吏治濟其儒行者與。四年。改江西省理問官。究僞楮獄。得直。于時翰林承旨閻公復持士論賢否。有言曰。白文舉父子兄弟俱有文名。敬甫幼負俊聲。老不入翰林。咎將誰執。奏爲翰林待制。復同僉太常禮儀院事。儀度閒整。贊導禋祀。動不踰矩。蒼顏玉立。眞善爲頌者也。桷向爲翰林應奉。幸得侍同朝。聆議論。接顏色。寬厚平實。言金諸老行事。歷歷指掌。晚自號竹梧。其爲文不事雕飾。扶掖後進。侃侃自持。知其於孝友有加也。

生丙午歲十有二月。至大二年己酉四月卒。于官年六十有三。積階至朝列大夫。有詩文若干卷藏于家。某年某月某日。葬于真定路真定縣之朱洛村。曾祖仲溫。隱德里居。妣李氏。祖宗完。金故贈朝列大夫。輕車都尉南陽郡伯。祖妣李氏。妣張氏。羅氏。君羅出也。娶盧氏。中書架閣管句順之女。翰林承旨摯之女弟。男五。淵。安。福州儒學教授。沆。蘄州路蒙古教授。皆蚤世。湛。今承事郎浙東道宣慰司都元帥府都事。洙。國子學正。灝。江西湖東道憲司書吏。先卒。女三。長適李棠。靜江路稅課提領。次適甄遂良。季適李權。河間路某州樂壽縣尹。孫男八。貞。采。暹。辟。楸。口。樞。桂。孫女四。曾孫男一女三。湛爲元帥府都事。桷適請告歸里。以事狀拜。且言先君子嘗得與子同院。銘莫如子。桷謝不敢辭。乃爲之銘曰。

有完者圭。藉之以韋。不泄其溫。禮祀用祇。受中以生。剛柔是宜。木神則仁。其用不陂。顯用太常。幼敏且岐。挹其粹精。飭躬以教。黜明養潛。爰燭姦暴。匪伊求之。我曷望報。道在一源。挈以簡要。詹詹炎炎。益飾其巧。佩玉舒徐。六轡濡如。執簡以陳。矢言不迂。彼計功者。承色善趨。較以虧成。卒喪其軀。有高維閔。茲爲守儒。恆山之陽。松柏茂直。詔于雲仍。是謹是則。臚仕之初。璫饒踵突。詢彼故老。曰惟祖德。我銘孔昭。庸告爾無斁。

贈翰林學士嘉議大夫馬公神道碑銘

浙東道宣慰使都元帥馬公踵門以告曰。惟吾先公。隧道碑未立。子職在太史。勳奮死事。貞逸之士。嘗焯焯紀著。登載金匱。先公仕雖不顯。其見知于世祖。受學于碩師。河內後進。猶能誦習遺事。敢以行實告。它

日上其事史館。則子實前史館。庶幾傳信可永久。敢再拜以請。謹按公諱充實。字士輝。覃懷河內人。父庭大父某。皇朝入中原。略地定圖貢。詔大帥專除授。嘗得署郡縣副貳。兵亂。大父以上名諱。弗可攷。公八歲遭大喪。從母完顏氏攜載。以從其夫李侯。侯長萬夫。隨征六盤。善謀畫裨贊。李益取自助。六盤爲高昌要衝。高昌之俗。收經史。立校官。地與西域接。故其聲音文字。詳於諸國。公得其說而習焉。世祖皇帝大一寰宇。命以其國語別立文字。用於印章。宣勅其字母。與西域相近。公旁曲通暢。單出雜比。會其指歸。學者爭詣門請業。許文正公薦于上。以儒服入見于柳林。委曲問時事。悉以國語對。上大喜。錫以錦帽。語翰林學士承旨某公。左丞相耶律公。宜以爲稠人師。遂僅授將仕郎。懷孟路蒙古教授。再授承事郎。襄陽路均州判官。然不樂仕進。嘗曰。我能知樹藝。遂力治其閒田。因原隰。以種所宜木。春華秋實。茂鬱滿道。過者咸曰。此馬公手植也。縣西有田二十餘頃。皆先世業。歲久。勢家悉占其肥沃。後服公純德。始原歸其田。卒酬直以受。方許文正公講授鄉里。時靳許可遊其門者。察以歲月。始命執弟子禮。獨見公篤厚溫謹。卽俾就列。授性理大義。以躬行爲先。公能守之。故其退讓無干進之念。而恂恂里閭。克修克儉。皆師訓也。文正公侍帝所無虛日。懷孟素產地黃。可釀酒。其脩治貴精謹。上問文正。卿弟子孰爲誠實。卽以公對。公素知製法。得山中石泉。如法釀。以進。許公之薦。將由是俾嚮用。而事若不偶。公復不以爲介。豈安於命分者與。後有奏爲河渠使者。又將奏爲蒙古院學士。皆力謝不受。里中有德大師。金內族。年過百齡。能知人壽夭前後。俱尊異之。公甫生一日。德夢其故友宋讓曰。吾今爲馬家子矣。後抱示之。摩頂卽爲笑容。噫。死生事不可

詰。若前史所載。又有若似焉者。寧勿書。卒于至元二十九年四月六日。年六十。葬于河內縣青平村先塋之次。娶劉氏。征西萬戶某之女。後公四年卒。生二子。長鑄。卽元帥公。次鎔。朝列大夫。廣西海道肅政廉訪副史。次娶李氏。生二子。銳。奉議大夫。廣州路治中。次綱。皆蚤世。女五人。適陳吉甫、張漢卿、王某、朱仲德、楊某。鑄男四。長德潛。內監尙衣。次德源。德淳。皆國子生。德淳今爲鎔後。德淵。府學生。女四。適太祝王世昌、戴彥實、李起宗、郭成可。銳男二。德潤。德溫。曾孫一。孟孫。至大三年。鑄爲禮部郎中。推恩得贈翰林學士。嘉議大夫。上輕車都尉。扶風郡侯。諡莊惠。劉氏贈扶風郡太夫人。李氏封扶風郡夫人。鑄官中奉大夫。浙東道宣慰使。都元帥。又贈公某官。劉氏贈某夫人。大父贈某官。大母完顏氏贈某夫人。桷於是有言曰。仕嘗患弗及其身。歿而子榮。推其榮。以及其先。而爲善之效著矣。世固有極其顯光。歿無德以傳。卒至于子孫流播。可勝道哉。元帥公中外揚歷。清白益著。今帥浙東。事不苟求。而明燭幽隱。不爲已甚。遺其後者。猶先公之志。是宜銘詩。以昭來世。銘曰。

相彼土田。或隰或陵。深根平培。蒼焉以升。實者缶之。茹者釜之。梓漆是供。絲枲是輔。種不亟求。曰惟歲年。視彼種德。亦云其然。溫溫馬公。植善無倦。仕匪蹇時。從我之願。經緯聲音。服習訓則。奉盈彌謙。以退以默。詔爾孫曾。職競是承。蔽芾長松。勿替厥聲。

翰林學士承旨榮祿大夫遙授平章政事贈光祿大夫大司徒上柱國永國公諡文康閻公神道碑銘

世祖皇帝應期握圖肇函諸夏。文經武緯。各當厥職。粵惟東平地。接鄒魯。時則有嚴忠武公。披荆翦蕪。扶植儒學。作成逢掖。卒能敷文帝庭。風動八表。郟之得人。號稱至盛。而閻。徐。李。孟。世名以四傑焉。自元至子大德。更進迭用。誥令典冊。則皆閻公所獨擅。公諱復。字子靜。幼入東平府學。蜚聲炳著。操筆綴詞。賦。音節和暢。融液事理。率占爲舉首。幼從贈翰林學士康公。康大器之。太常徐公道隆年長。有聞譽。不敢以後進待公。在翰林最久。贊書積几。高下輕重。擬議精切。傳誦以爲楷則。其待僚采。擇敏秀者自近。不滿意者。不復強以文墨任滿。不調。雖請託亦不得以敘遷。故事表牋。自待制而下分課。公命各爲一通。輯其精良。融爲一家。而別擬以示其屬。始仕東平。行臺書記。御史臺掾。至元八年。入翰林。爲應奉文字。進脩撰。十六年。陞翰林直學士。十九年。侍講。明年。兼集賢侍講學士。于時兩院皆領會同館。由是自應奉至侍講。皆兼會同。二十三年。陞翰林學士。改集賢學士。大德元年。復除翰林學士。四年。拜翰林學士承旨。而知制誥脩國史。皆視其職以進。其補外職。則僉河北河南道提刑按察司事。浙西道肅政廉訪使。世祖陟方。召公草詔于上都。成宗繼崩。復召公上都。武宗卽位。首上疏曰。惜名器。明賞罰。擇人材。朝論聽之。賜金錦白金以彰其直。顧公老矣。願致事以歸。乃進階榮祿大夫。遙授平章政事。給半俸以佚其老。且命壻李嗣宗。特授承直郎。同知高唐州。以待養。仁宗在東宮時。知公歸。特遣使賜幣。命公卿設祖帳于都門外。檄嘗以院屬侍公入議事堂。鵠峙山立。中外各改容以奉。語簡意足。不屑屑持辨爭。丞相而下皆傾動。一日草詔書。其語意難以入國語。大臣疑之。有集賢學士亦出微語。公召掾史具紙筆。請學士改撰。學士大愧。卻立。會食。

畢公改爲之。而前詔一字不復用。一坐大驚。公以文墨自任。不肯爲緊要官。罷尙書省時。世祖召入便殿。諭以卿爲執政官。何如。公謝不能。世祖曰。知讓誠美事。宜勿強。成宗擇相。召公密問曰。左丞相缺。孰可任。以江浙行省左丞相某對。益稱上意。其陳于上者。大較若是。定孔子主祀。賜孔林灑掃及祀田。皆所建明。興國學。論廟樂。所助爲多。而其在憲府以敦本崇化爲先務。當大德星變。疏十九事。皆切中弊壞。成宗賜楮錢萬以優寵。公受知成宗爲深。嘗問其所師承。金玉幣器。錫寶有加。仁宗初政。首命召公。以疾辭。皇慶元年三月某日。年七十有七。薨。其年五月。葬于先塋之側。公將薨時。夢游祠宮。有道士迎問公年。口占一詩以答。覺而言曰。吾殆云逝矣。世方倚公爲重。而公不復少留。可慨也矣。其所爲文。號靜軒集。內外制集。若干卷。將傳于世。桷由泰定元年得告歸里。越明年。公之壻奉直大夫南臺監察御史李嗣宗。以書來海濱。告曰。子職在太史。出處大致。子侍承知爲詳。隧碑未立。願登其事于石。以貽永遠。桷踧踏莫辭。謹按閩氏。平陽人。今居高唐州。曾大父衍。贈嘉議大夫大司農卿永安郡公。諡懿德。妣趙氏。永安郡夫人。祖和叔。贈昭文館大學士資善大夫永安郡公。諡昭獻。妣武氏。封永安郡夫人。考忠。故高唐主簿。贈銀青榮祿大夫大司徒永國公。諡惠穆。妣牛氏。劉氏。追封永國夫人。娶尹氏。趙氏。李氏。男一。嗣慶。以蔭授奉訓大夫廣平路威州知州。未任。以疾卒。女一。孫男二。翁安。翁壽。女適卽御史君也。公旣下世。婦弟淮東宣慰使李處恭。時爲吏部侍郎。慨然曰。吾寧使閩公終無以易名。遂請于朝。得贈光祿大夫大司徒上柱國永國公。諡文康。其姊亦封永國夫人。而公三世亦以令典。得追贈並榮。猗歟休哉。銘曰。

泰伯之曾。食采於閭。因邑爲氏。慶源涓涓。太原之閭。顯武後唐。戰多著名。分茅爲王。有孫曰象。決科就文。撫綏降邦。拯其溺焚。迢迢裔孫。實家平陽。試邑死事。和川歸藏。是生惠穆。占籍名郡。推誠急施。樂善不靳。教子有行。俾離其鄉。業精行成。何求不償。顯允文康。以文偉著。執其牛耳。莫或敢侮。斟酌泰和。密勿元氣。英露喬雲。萬物屬最。鎮于詞垣。幾四十年。矜彼不能。擢才進賢。維我世祖。養茲國珍。薦更三宗。猶昔舊臣。公歸白雲。多士肅悼。凡今日能。亦公所造。何以遠貽。有豐其碑。實茂聲弘。播于銘詩。

周瑞州神道碑銘

景定元二間。賈相某。隱城下盟。罔宋帝理宗。邀奇功。外受強寇。內括民業。廷紳鉗舌。奉風旨。稍異議。輒諷臺臣斥去。小者歸田里。大者入蠻瘴。時則有豫章周公。以史館檢閱。入對曰。李璫由山東來歸。實急而求我。區區一旅。瞭然可見。借援無功。彼敗我辱。招覺之道。梁武在位四十餘年。卒墮其計。陛下臨御日久。不宜復蹈前轍。父全逆叛。著在信史。已登告于祖廟。璫乞改正。是作史者。誣枉逆全行事。淮東人猶能道此。亦陛下在宥之所覩。困獸投林。誠不可使縱意干紊。又曰。臣近覩輔郡和市富室田業。以備軍餉。良以和糴廣造。楮多則楮益賤。是誠不可不變通也。今所在置司。擇其上腴。低直以酬。又欲令賣田之主。抱佃輸租。歲或荒歉。田主必當割他租以補。他租既竭。歸于耕夫。耕夫逃亡。歸于鄉役。可謂獲近效而忘遠慮。自漢以來。納粟補官。歷代循用。輸粟既微。補爵亦輕。不足以動豪民。臣宜以爲由尙書省樞密院吏員。爲出身。定品格。立止法。則大家相肯以勸。可以立辦。粟可無糴。楮可減造矣。疏入。相大怒。言者急擊去。而

公風節言論著江表。公諱應合。字淳叟。七歲授詩書。通習大義。年十七。父如翼。贈朝奉郎。母胡氏。贈安人。相繼卽世。逮事王父友賢。以卓行稱。宋寧宗朝。嘗旌其閭。書棣華扁以賜。號爲棣華周氏。嘗從棣華君至近郊。望邑有火光。亟返。奉安人柩入祠堂。袖神主以出。王父奇之。紹定四年。詞賦應鄉書不中。始悔曰。吾安能事雕刻。乃學春秋經。結廬深密。探微索幽。從者益衆。淳祐九年。應試兩浙轉運司。果冠諸生。十年。有旨試轉運司者。入別院。復在首選。授江陵府府學教授。待次歸里。授生徒。曲爲講說。會歲饑。首率鄉黨立三事。一曰貸貧民。二曰濟疾苦。三曰賑游末。包公恢記曰。是三者。足補義社倉之未備。十三年。官江陵。首講孟子曰。壯者以暇日脩其孝弟忠信。此凡民也。士無一日而不脩。士不當以壯幼論。師友言行。去其偏黨。據會立要。學者深德之。創鄉射齋。申勵武備。別立凡例。以脩郡乘。趙丞相葵雅知名。會宜撫荆湖。辟爲元寮。以志書未成辭。馬公光祖帥荆湖。師援夔路。俾爲屬。主贊畫。蜀事益急。詔趣馬公援蜀。馬公聽羣議不決。公獨贊進師。乃解。開慶二年。馬公帥沿江。復佐江東。兼長明道書院。淳公嗣久絕。詢諸池陽。得五世孫偃。孫以主奉粹二程遺語若干卷。復以馬公命爲新金陵志。自史館歸。外補通判饒州。後攝郡事。決疑剖姦。絕煩擾。催督部使者爭薦之。咸淳三年。主管華州雲臺觀。四年。通判寧國府。其治如番。而補其前。逋復攝郡事。大脩學宮。除輸苗之不便於民。復梅都官諸孫。斥豪禁吏。人不敢以犯。湘帥汪公立信。舊同寮。奏辟通判潭州。兼參議官。丞相審治行目。諸賢交章無虛歲。亦欲俾出門下。諭意長沙。毋行。公不可。相聞益怒。會江文忠公在相位。以國子監簿進擬。亟命御史李珪覈劾。德祐元年。登極恩。復官。是歲。賈相兵敗。

走維揚起守寧國。江西以瑞缺守。辟知瑞州。將治兵爲固圉計。與帥議不合。劾去。素善訓子。長子天驥。年六歲。敏記誦。宋有童子科。俾習之。年十一。以能文詞舉。後登上第。人取以爲法。寰宇合一。天驥守吉州。迎以養。卻甘茹蔬。感慨遁迹。人不知太守爲有父。至元十七年卒。年六十有八。眉山程尙書公許嘗語曰。君理義則濂溪。章表似平園。以溪園自號爲宜。維周氏籍會稽。唐以憲銜官鎮。遏江州曰勅。爲御史中丞。銀青光祿大夫。因家江州。六世孫曰師。教訓生徒。里人稱曰一經居士。又三世曰昌元。妣胡氏。是生棣華君。子男四。長卽天驥。次天虎。天鳳。天龍。女適朝奉郎經略參議官吳疇。吉州教授劉明仲。從仕郎潭州路湘陰令冷頤孫。孫男十二。志道。某官。志仁。志德。志學。志義。志立。志遠。志禮。志行。志敏。志伊。志崇。曾孫男十六。女二。四世孫十有八。五世孫三。娶王氏。繼萬氏。俱封安人。其葬在吉水縣同水鄉臻善里鷓鴣山之原。天鳳幼歲入官。熟昔時言行。罔缺軼。桷備翰苑屬。與之言論傾倒。身履目接。人則曰官簿不足恃。久而曰彼兩家不可輕。桷投絨歸里。強使校文。天鳳以泉州推官同在院。未幾。桷以喪子歸。天鳳請銘。銘曰。蹇蹇史君。內剛以文。察其要機。叩于帝闈。蒙恥冒功。厥脛四聞。我后不知。惟相之云。佐郡未幾。輒劾以去。冥心委順。不懼伊沮。山鑿野刻。勤彼纂組。謂宜掌制。命則不遇。教子有謨。見其提符。我實故臣。逃空以媿。叔也秉文。庭誥靡渝。詵詵者孫。冠佩是似。宦若不偶。名則罔替。昭銘松阡。以告良史。

有元故贈中憲大夫中書吏部侍郎騎都尉陳留郡伯郭公神道碑銘

大德十一年。桷再入翰苑。郭侯郁文卿時爲江浙行省都事。獲締交焉。見其受易學于侯先生。得見尊公。

于庭下。延祐五年。文卿爲中書檢校。余時直集賢。來往益密。而其尊公正席危坐。凡辱交于文卿者。咸執弟子禮。嘗聆其言曰。吾兒幸竊祿位。不敢以自喜。其所行事。未嘗不察其指要。而足以垂後者。亦將以示吾子。若孫。居吾語子焉。始兒以吏能及格。爲掾都省。定水縣門。計功以便民。民不敢譾。而官費以省。晉山荐饑且疾疫。親歷其家。去僞冒爲善藥以治。得活者三千人。爲宣徽都事。行省都事。句稽奉公。增餼羊若干。而浚役于松江者。去其工直十有六萬石。吾懼其瘠于民也。民不以病。是則吾之所深喜也。于時衛府調卒萬五千。至都城。計其往復俾俱。以九月集白于省。大臣許之。至則器甲精銳。士馬肅給。爲諸省冠。其餘稽工會程而不志苛刻。於余諸孫。良有望矣。其在浮梁也。迎余以養。見其治學宮。立鄉校。廣弟子員。知余後裔之必有以儒術顯者矣。公之語於余者。知其嗣必昌也。公飲酒不亂。道金朝遺老行事。猶能反復感慨。鄉人尊爲隱君。是年八月。卒于京師。得年七十有六。公諱天祐。字祐之。世居汴梁。封丘縣呂村。祖進。考誠。嘗職民千夫長。娶林氏。汴梁爲金遷都。兵逼野處。僑居大名。大帥器之。因以長千夫。郭氏大墓數十。兵亂蹂籍不可攷。而新塚猶存三房。審其爲大家明矣。延祐六年八月某日。葬于先塋。郁爲浮梁州。以大賚恩。進封奉政大夫。知宜興州。驍騎尉。延祐七年。郁授中順大夫。知高郵府。至治三年。授中憲大夫。同知兩浙都轉運鹽使司事。泰定元年。授亞中大夫。僉江西湖東道肅政廉訪司事。二年七月。贈公中憲大夫。中書吏部侍郎。騎都尉。陳留郡伯。未幾。郁改授慶元路總管。桷嘗以謂貴顯之及於親。必原於遠祖。親榮矣。而考其若子之行事。是猶望於後也。自侍郎之無祿。亞中公四歷要官。桷略其治狀。以待郎之言。

爲可證。豐功茂德。見於去思。誠不在是也。配李氏。累贈陳留郡君。公男四。長亞中。次迪。嘗爲錢穀官。厚海道運糧萬戶府百戶。仁以黃陂主簿。今爲江浙行省掾。郁娶孫氏。封陳留郡君子。子三。澍。渥。國子生。壽。蚤卒。迪娶崔氏。子三。厚。娶崔氏。子四。仁。娶孫氏。亞中來乞銘。銘曰。

大梁之區。厄爲兵墟。層城鬱嶽。以薙以鋤。維郭氏先。歷有譜圖。迢迢郭公。在唐紫朱。吏部有謙。弗克以居。以其先聞。維訓苗裔。味道養齡。擊鮮以娛。治官莅民。考于庭趨。大樸弗雕。盛德莫踰。維公有子。克遵令謨。述銘孔昭。勿替勿渝。

王氏先塋碑銘

延祐四年中書左丞王公。出爲江浙省右丞。將行。天子遣使由上京傳旨曰。毅其勿行。七月。拜中書省平章政事。由是推恩如令式。得贈其曾祖爲正奉大夫。山東東西道宣慰使。上護軍魯郡公。妣周氏。魯郡夫人。於是平章拜命。惕然有言曰。維我祖蓄德闕華。慶貽孫曾。稚昧實蔑克稱。天子寵綏于臣子。厥亦赫厚。願敘先德。以收合宗譜。子職在太史。爲我表而銘之。桷謝不得辭。謹按郡公名汜。世家德州平原。金將亡。士族奔播南徙。郡公有子全甫。七歲。隨從母走亳州。稍長。壻田氏。由須城鄆城三徙。後占籍汝上。晚歲嘗謂子曰。吾幼罹兵凶。僅能記我考妣名字。遺諜舊事不復省。今祖墓在平原郭東北五十里。曰水務鎮。我死力不能歸葬。若等毋忘平原也。今以平章累贈資德大夫江浙等處行中書省右丞魯國公。公二子。長田玉。次曰傑。二女嫁張氏葛氏。玉嘗一試吏。輒謝去。謙約無表襮。策杖鄉社。通慶弔。煦煦無億意。今年八

十有四。以榮祿大夫河南江北等處行中書省平章政事柱國魯國公。致政于家。始平章以詹事歸養。魯公曰。聖天子軫齒召至渥。我雖耄。尚善飯。汝不效犬馬報。居家何爲也。又附詔使奏曰。不佞老臣骸骨堅且強。謹遣臣毅一心事陛下。上大喜。特授集賢學士資德大夫。其配郭氏朱氏。封魯郡夫人。後以推恩進郡公。訖封魯公。魯公子三人。長平章。平章子思恭。思齊。思聖。思誠。思明。次子謙。謙子思禮。思義。幼子鼎鼎。子思道。思問。曰傑。魯公弟也。子四人。愿。讓。諒。懋。傑。孫思正。思進。思忠。思溫。思益。噫。平原之墓。由郡公得封。今始有表焉。郡公之若祖。若父。名字弗可考。隆然兆域。則皆在其上。而諸孫之與平章同高祖者。凡四房。猶在平原居。平章振興于百年之後。因郡公之追榮。合譜繫族。俾五世之本支。橫列旁附。將使之孝謹。自將益昌其祖。可謂厚也已。銘曰。

哟哟平原。土墳宅舒。民用泰寧。聿勤佃漁。自河雲奔。邑屋播逋。有變者雖。宵衣走途。九折其行。益南以趨。由毫投汶。靡定厥止。稅于須城。客鄆以俟。復還于汶。以鑄以耜。望彼北河。有隆坡陀。企焉音容。戰兢弗磨。衡門之棲。韜精養和。曰我此有籍。我墓伊何。戒而孫子。勿忘勿圯。番番魯公。樂道趾躅。允也魯公。不銜以試。藝而黍稷。亦有魴鯉。邀嬉大盍。訖用燾祉。篤生辨章。爲國之梁。夸毗弗師。佩瑀秉璋。諤諤藎言。百壬避剛。始事東宮。岌高偃讓。告疾遄歸。厥聲四揚。魯公在堂。曰汝來庭。國恩靡效。慎其寐興。汝車疾驅。我餬斯寧。鴻化惟幾。靖希隆平。勿忿以媚。勿喜以矜。帝曰汝嘉。庸遏南征。乃晉平章。袞衣具榮。視品追秩。三世是錫。平原之塋。松柏茂植。維高維曾。爰勗懿德。寸雲敷功。下土霈澤。輝燭祖芬。肅爾承翼。合宗別支。秩秩毋

素瞻彼中林。王氏之本。匪祖曷思。匪譜孰辨。春秋墓門。蟄蟄在獻。紹聞象賢。繩武以昌。平章之心。孝思不忘。刻銘先塋。久載用光。

邢氏先塋碑銘

邢氏世居彰德安陽之交口村。金亡。大姓散走。譜謀塚墓。軼塞。李高曾莫能考名字。維邢由酒使君始著。君諱植。字子實。幼隨父母竄處林谷。親疫死。從兄林歸里。力樹藝自給。厚德卑讓。以先業奉其兄。後居城中。蓄善貨取贏。頗以財自振。尚義急賑。兄無子。訖盡力治生死。每曰。嗇用近禮。愛物近仁。執信守常。吾何慊焉。坐肆中有客數人。貿繖於肆者。罷肆繖有白金遺焉。追客莫及。明日客至。君先授之。客曰。果有遺。不意在君所。誠大長者。相謝以去。庚戌歲大災。郡蕭侯率民攜纆缶。力用命。不可滅。至君舍。乃反風。侯敬禮之。始以推擇爲酒使。歲終第籍上。庶窶戶無所納。乃悉以己財補輸之。書券於君者。毀不問。後不肯仕。鄉閭化之。至元二十四年三月二十有二日。以壽卒于家。年九十有六。初娶李氏。繼楊氏。李生子曰德裕。字裕卿。風度皎皎。展君所行。整暢爲儒吏。擢本路錄事。路隸某王分土。俾復爲酒使。至元四年。銓選格行。授將仕郎博州路錄事。遷潞州判官。再遷從仕郎陽翟縣尹。又遷承事郎藁城縣尹。其洩博州。調征南軍。不使富民委役於貧。潞州有疑獄。立剖之。而讞陽翟獄尤著。民王氏有婢。竊其簪珥酒壺以逃。盜不可得。誑相連坐。乃密詢其素所往來。或曰。王氏姪誘婢他之。度不可俱行。因殺之以利財。後卒獲其姪。一訊輒引服。縣人大驚。爭持酒殺以賀。在藁城會真定無極縣軍隊長匿戍卒。餓二萬五千緡。詒言室中夜遇盜。

告于官。三年不能獲。捕盜官多受罪。挾疑似。坐獄者三十餘人。府以白樞密院。咸曰：是能決陽翟疑獄者。檄君以問。入其室。左右視驗。實無有盜跡。呼其孥二人別居之。所對皆異辭。遂直入其室。發床下。軍鑕咸在。卽日獄具。而君以二十九年六月一日卒于官。年六十有七。初配王氏。再配郭氏。皆葬于交口之祖塋。有子五人。長曰秉仁。字仁甫。曰秉義。某官。曰秉禮。曰秉智。某官。曰秉信。女四人。皆適士族。孫七人。女孫七人。仁甫始由憲司筮仕。入掾臺省。兩爲太醫院行省都事。鐵冶正副提舉。一再爲二千石。治撫州。興學禮。士盜不敢入境。治廣平。亦以善理。冤獄有能名。郡民立去思碑以祝之。今以嘉議大夫禮部尙書致仕于家。而藁城君卒。以尙書爲提舉。時推恩。得贈朝列大夫騎都尉河間郡伯王氏郭氏。皆封河間郡太君。尙書之長子溫。字孟直。更迭省部。由御史徧歷中書左司官。諳習故事。而克謙慎脩。以禮度自處。今授亞中大夫大名路總管將之官。致尙書公之命曰：父子俱受朝廷殊遇。列三品。夙夜兢惕。實爲先德。淳蓄再世。以昌。應後人。徒知邢氏之盛。而莫知二祖之勗。善培本者若是。願刻諸墓上。因子銘以昭示于後。乃銘曰：雲雷之交。經綸靡寧。上降下騰。甲坼是承。劬儉于躬。不企其成。蓄極斯泰。奕奕振亨。折獄探情。罔用口才。奮以裕衆。茲惟艱哉。維子維孫。享其胚胎。仰俯橋梓。播美益培。霜雨濡降。永思彌虔。詔而後昆。絜其簋籩。仕以飭身。止以樂全。過者必式。茲爲邢氏厚德之阡。


任氏先塋碑銘

青齊由尙父啟封。土沃民阜。擅魚鹽之利。山水險阨。雄偉冠鄰壤。昔時宰輔。願優逸自便者。爭乞守是土。

勝概見於職方氏。數千年盛矣。劉豫。貌父子背宋。以千里赤子。驅爲兵徒。犯順滅德。金主悟其元惡。傳旨就戮。而青齊戶口。物故過半。完聚未幾。李瓊復懷逆。抗拒齊部所領。益莽爲墟。落痛矣哉。任姓世著滕州。傳緒益遠。有元帥府君諱杞。以宏諱府君爲遠祖。葬于薛河源。宏有七子。擢文武科。墓碑燬落。今由元帥府君始可譜。府君娶王氏。二子。長曰銳。金武舉進士。終千夫長。次曰釗。字某某。幼長戈革。篤考古今成就。郡以進取。自任鬱不得志。持素所講習。訓導鄉黨。陳義抑惡。片言總榮。恥薰受以化。咸曰。繫任公所成就。郡縣以其行。舉于朝。辟行軍總管。再舉沂州臨沂令。皆謝疾不就。始由沂州歸于滕。築室祖墓。一日。蔓火燎于野。逼墓次。公號泣伏墓。所有頃火。由它行。郡嘗上其事。府君曰。吾得歸故里。守丘隴。奚外慕焉。美鬢善容。偶黨以隱逸自傲。至元二十四年九月六日。年八十有一卒。以孫貴。贈樂安郡伯。娶周氏。贈樂安郡君。三子。長曰榮。曰滋。曰英。榮由元帥府知事陞閩海道提刑。按察司經歷。以不樂入嶺嶠。改授廬州嘉興總管府知事。善心計。仕泊如也。以子貴。贈某官樂安郡侯。娶單氏。贈樂安郡君。生子四。長曰居敬。善吏事。所至有能名。爲建康般陽路總管。今以通議大夫禮部尙書致仕。娶王氏。樂安郡夫人。尙書子擇善。承務郎。樞密院都事。執善。江南諸道行御史臺譯從事。女三。孫三。曾孫三。曾孫女一。曰居禮房。娶李氏。七子。師善。中政院管庫。兼善。秦寧路司獄。思善。蚤世。明善。進善。悅善。從善。始學仕。曰居仁房。居仁爲鷹房總管。府經歷。娶王氏。馬氏。志善。適善。達善。宗善。曰居義房。娶丁氏。伯善。性善。友善。合子孫與曾孫四十一人。郡伯次子曰滋房。娶李氏。生子四。居安居。信。居寬。居口。合孫與女二十一人。郡伯季子曰英房。四子。居實。居慶。居

厚居德。合子女十人。嗚呼。由府君至于今。凡五世。通其譜。幾百人。世莫可儷。豈非其孝感于鬼神。蓄極以通。故仕者振于朝。而其未仕者。各相勉。思繩祖武。以自顯。匪表于墓。則曷以彰。盛德擇善。深湛雅思。見事不苟。與桷同備。屬翰苑厚善。而尚書亦屢瞻其儀度。俾有述焉。奚敢辭。銘曰。

滕薛之間。任國首封。傳於東都。齒秩有崇。禮食是問。邈其遺風。泱泱三齊。絲枲沃豐。執智秉機。厥俗攸同。允也府君。厄於兵難。閱詳興衰。訓言閒閒。左閭右塾。化其慆姦。隱身墓廬。以號以攀。仕不強希。榮恥莫干。雲藏靈淵。磅礴蒼鬱。朝躋于陵。百谷瀾溢。德盛莫居。子孫秩秩。聿來墓門。展祀芬苾。敘昭辨穆。孝謹罔失。



清容居士集卷第二十八

墓誌銘

翰林學士嘉議大夫知制誥兼修國史趙公墓誌銘

長代院作

大德七年正月辛亥翰林學士趙公晦叔卒於官其年十月中書右丞相入對天子曰趙與懋事世祖皇帝幾二十年事陛下亦將十年敦確清謹今既死無以歸骨于里敢奏以請於是天子命有司賻緡五千復給舟車傳費俾其喪歸將行孟實等以狀來請銘復往歲直翰林公爲待制其敘遷也亦相先後知公尤詳義不得辭方至元十四年間公以驛來朝深衣幅巾見世祖于上京冰澄玉瑩詞氣整朗言宋亡根本所在親切感動世祖傾屬自是入翰林爲待制爲直學士累遷爲眞學士公之爲侍講也言江南箕斂急督移括大姓宋世丘壘暴露皆大臣擅易書詔明旨又言庚寅歲大霧蔽塞正月甲辰虎來西城其徵爲下臣執權箴政言雖不行而公閉門待罪後司徒公俾同列諭意始復入署公每視職清望近思欲以言議質直理道確近條縷報上故所言嘗若剴切無隱而世祖皇帝沈幾先物神量莫測或爲公懼至平章政事不灰木公爲公奏私負歲積皇帝曰得非指故臣爲虎者宜官酬其逋別給廩粟布帛以養由是始知君臣相與脗合明著如是曾祖伯洙宋朝議大夫知南外宗正事祖師雍宋朝議大夫直寶章閣考希聖宋宣教郎史館校勘高祖宗正某南遷時丞台州黃巖因家焉伯祖師淵與朱文公纂次通鑑綱目

凡例。微言奧語。耳受身履。故公所行尤近。嘗與許公仲平論伊洛闢域。首言力行致知。清簡惟高。沈默自秘。皆東南極弊。文以顯道。捨是無以議。許公深然之。至觀公待人愛士。恩禮周洽。不爲疏數。翕訛其持家簡泊。無復商榷計慮。非深知道者不能也。天性孝友。自宗正而下四世。力請于朝而復其役。贖姻黨男女爲奴。而不能歸者。凡十有一人。始登宋辛未進士第。爲鄂州教授。由鄂來京師。迄爲翰林學士。知制誥。同修國史。積官至嘉議大夫。年六十有二。其所成就。不爲甚過。而公以榮祿豐遇爲可愧。不獲老田里爲可恨。噫。公之心如是而已矣。初娶夫人舒氏。不一歲卒。歸囊中裝于婦翁。不取。今夫人史氏三男子。孟實以公爲侍講時。特官爲承事郎。同知瑞安州事。孟賚温州路蒙古學教授。孟貫將以廕入官。以某年某月某日。歸葬于黃巖塔山之原。復書讀大雅文王之詩曰。商之孫子。其麗不億。上帝旣命。侯于周服。侯服于周。天命靡常。殷士膚敏。裸將于京。以知文王之德之盛。商士之恪謹溫遜。篤承天心。維我世祖。明德造邦。式混區夏。內外小大。共爲帝臣。而公陟降左右。承賚接錫。終始若一。至於不幸而死。今天子復申命而寵綏之。則公死猶無死也。是宜銘。銘曰。

祿不斂贏。謀不課利。我以其拙。彼以其智。衣敝策駑。內澡玉雪。誦聲清泠。鏗出金鐵。響響九關。壬人殞魂。維帝有訓。四方于聞。之身云亡。之德不爽。丘環麓茂。一息以往。繫畀之豐。維時之通。尚詔後人。以封以崇。奉訓大夫昌平等處屯田總管贈亞中大夫永平路總管輕車都尉宣寧郡侯劉公墓誌銘

太祖皇帝沈幾整武。蹙金隳南。乃肇定中原。物土萌蘖。橫出迭變。莫能稱上意。將草芟而獸蒐之。久而曰。

噫。吾赤子也。始料其民。俾執藝丕作。故家大姓。爭占籍自詣。遂得脫鋒鏑。野處以居。飭材辨器。咸精其能。而人益效用。國以富強。猗歟盛哉。故昌平屯田總管劉侯之祖仁。時爲金軍器局副使。治于汴。至是率其屬徙北以行。副使之考秉文。家河南。世儒族。讀書通大義。審金將亡。兩河大饑。家故饒。傾所積以食餓者。或曰。歲荐饑。宜善蓄以俟。府君曰。國迫民流。旦夕當走。守穀可乎。守子孫可乎。後副使由燕居宣德。奉府君以養。終葬于宣德。爲祖域首焉。副使隨軍而北也。諸匠官所領。道亡過半。獨副使整部伍。工作皆完繕。帥大人奇勉之曰。吾當入白上。擢以美官。卒俾見太宗皇帝。授諸路人匠提舉。後陞總管以終。其配馬氏。故涿郡馬令公之女孫。男三人。長伯英。雲州判官。季伯豪。安平縣尹。仲卽昌平君。諱伯傑。字巨卿。習土俗。騎射。尤善諸部語言。初從其父至大興。見尹郭汝梅。郭以能理劇知名。善鑒識。一見卽命佐麾下。使候賓館。使者鞭帽駢集。指畫不可辨。能悉其語意。周折省約。使各慰謝以去。尹益取自近。壬子春。憲宗獵澤州。柳林尹日扈從。治供頓。一日。上問尹近郊歲入州戶籍多寡。尹愕謝莫對。輒從旁具對甚習。上喜。顧侍臣曰。是人宜爲官。官寧有不能會供應。官忤旨受誅。乃授警巡院判官。卽不避署事。先白所司。言京師號賈區。奇貨善物可立致。官減其直。歲盡且不與。雖百置市令無益。卒如所白。而官取需始輯。秩滿。府咸曰。捨劉君孰使。遷本院副使。再遷院使。歷院四。曰大興。宛平。易縣。樂陵。循撫慰煦。倉卒泛索。不假氣色。卒不使煩擾。事益以理。古言京師號難治。若內縣得一善。滿輒蹈足以去。君所爲官。凡七遷。皆畿亦繁職。使忤貴近。一斥不復上。驅民迎合。將促數苛擾。曷得更取迭用以自顯。若是則其治狀可無愧矣。其治樂陵也。鷹

房數百人。從旁縣來。糗肉滿馬尾。意樂陵可稱意。讀令諭之。召其首曰。使果犯。誠不實汝。卒避去。推樂陵所爲政。其治它縣與府院。蓋可知也。後爲昌平路屯田總管。積官至奉訓大夫。卒。以至元二十三年四月某日。年六十有五。其葬在大興縣招賢鄉烽臺村之原。男六安。易縣尉。蚤世。弼。監太倉支納致事。裕。宗。皇帝年勞補官。積遷中大夫建康路總管府事。佐承務郎同知深州事。敏。從仕郎深州判官。敬。承事郎藏珍。庫使。女三。長適幽州賀進。次適承務郎尙舍監丞蕭某。次適嵩州判官田從義。孫男九。可大。將仕郎同知馬籠州事。可久。蚤世。可浩。崇祥院尙印。可任。幼侍東宮。進義校尉。行篋司藥局副使。可復。可真。國子生。餘尙幼。孫女五。長適安平王某。次適幽州郭炫。保定子傑。幽州朱棟。蔚州宋某。延祐中。贈典行。致官三品。得贈二代。始追封亞中大夫永平路總管輕車都尉宣寧郡侯。夫人宋氏。宣寧郡夫人。而祖父亦贈中順大夫宣德府知府驍騎尉宣寧郡伯。配某氏。宣寧郡君。桷。往與太常博士楊君宗瑞游。過其塾。見劉氏諸孫。齊襟受經。雍穆有度。而建康公禮法自持。未老倦游。肅然以門戶訓勉。今觀博士行述。儒素之積。實由河南來。禮不忘其本。遭時照明。將於是乎振。遂不讓而爲銘。銘曰。

巍巍元后。成玄功。鏗戈誕指中州。從鷹驚鼠。竄毫與童。土金石木獸草工。各飭攸職。程作供。徙彼儒族。漸勁雄。敕甲奉貢。朝紫宮。語言清琅。續耳聰。指掌代對。剖臆胸。天府赤縣。更選庸。貴瘠瘡。瘡伏氓。顛顛游。刃不。缺至理通。大椿靈根。壤墳豐。美蔭蔽芾。宏闕崇。鏡銘堅珉。德彌隆。

將仕佐郎信州路儒學教授陳君墓誌銘

大德丁未。余供奉翰林。與廣信陳志仲游。粹然以容。慎密不妄言。間語昔時祖子孫家慶故事。志仲莞爾。言曰。吾大父迪功君。大母程夫人。罹兵難。時年七十餘。我嚴君衛鄉保。入侍二老人。嬉戲盟饋。奉禮如昔。迪功君年愈高。別築華山梅堂以奉。益不復知有世事。于時諸孫實五世矣。迪功君號南隱翁。翁終時年九十有四。方南隱翁無恙時。諸父皆逝。唯吾老人力整門戶。訓兄弟子。後以儒術興者。凡若干人。幸爲我記華山焉。己酉歲秩滿南歸。余師剡源戴先生教授信州。亦還言廣信多郡博士。獨陳博士溫讓材智。篤素慎行爲第一。方有司急庸調。徵儒生幾二千人。能力言而盡復其役。汝官京師。有名敏學字志仲者。其子也。與之游乎。未幾志仲以信州教授致仕。命歸榮其親。後爲宮師府司經典籍。稍遷太常。留錢塘。遇之。則又曰。吾親年七十時。嘗爲書授敏學曰。年至而仕。非古也。壯者必仕。仕不求祿養。吾視大父年不敢。幸氣血康完。若二兄恂恂善持家。勉若以仕。勿懼也。皇慶癸丑。余復入史館。志仲則以太常舉。將爲博士。冬十有一月。訃至。凡所與游者。皆入弔。越三日。凶服踵門。泣不能言。以國子博士虞集之狀授。桷俾爲銘。君諱萬里。字德甫。弋陽縣人。幼善屬文。長從工部侍郎諱公禾學詞章。起居郎徐公直方受理學。謝公枋得。張公卿弼。植志節。咸淳癸酉薦于鄉。後起家廣信書院。大修燕居堂。面帶湖。立諸生論古今成敗道理。遺言微旨。文質益損。皆口授手畫。諸生不忍去。請于官。留帶湖凡十年。南隱翁卒。學者咸會葬焉。雅性寬厚。善清言。與人交。久而彌篤。歎歲疾札。發粟施藥。以全活。家多書。讐證成善本。謂諸子孫。天佚吾老。吾遺爾書。守儒爲準。守身爲本。餘何言哉。壯歲慨然慕詞學。故於章啓語尤精。噫。方宋文治時。立博學宏詞科。

番陽三洪公周文忠公。迄致清顯。至呂成公真文忠公。闡正學。彌貴重。真傳諸徐鳳。徐鳳傳諸尙書王公。應麟公曰。中是科者實有命。晚歲問難。無以承諸生。徒自辱爾。桷聞是語。愧汗累日。今幸與志仲交。意謂從廣信山中。論竟斯道。今不可得矣。屬續之日。戒勿用浮屠事。實以九月某日卒。得年七十有六。以某月某日將葬于永年鄉之吉田。曾祖謙道。祖應隆。考文光。卽迪功君也。長子誼。次天驥。皆爲郡學官。先娶程氏出。次敏學。將仕郎太常太祝。今方氏出。女三。長適方晟。次徐某。次方天祐。孫男七人。長師中。第五孫弘。爲大都路儒學錄。孫女五人。曾孫女二人。桷嘗謂士患不得名。巖居谷隱。一時推可。多任俠尙輕重。若先生者。休然養名。平進安時。鄉閭化之。郡縣企之。孫曾承之。歿有餘德。古所謂鄉先生者。陳氏之門見之矣。是宜爲銘。銘曰。

日劬其躬。以濬其逢。不逢樂天。脩齡以終。帶湖之徒。來會幽宮。彼列者泉。樹之青松。而子而孫。慎其延弘。式昭墓門。百祀弗窮。

陳士直墓誌銘

咸淳三年。浙西提點刑獄戶部陳公卒。大臣以公清直挺著。特官其子鬻伯。是曰貴白甫。有子命名。長曰紹廉。季曰紹庭。廉言清庭言直也。壬午歲。余過奉化。入其里居。拜戶部夫人于堂下。退揖貴白甫于賓次。識二子焉。其季紺頂斑襦。眉目刻成。燁然碧光流几席。稍長。羣諸生誦聲琅圓。端默絕外嗜。又十年。貴白甫居徙江澚。復入城僑館。則季已加冠。字曰士直。神益完。貌益整。肅客侍立。無倚怠。退具醪茗。動中周折。

不復俟指顧。間從士直坐書室。鉛黃森錯。卷帙整束。受業退暇。琴清筆潤。花竹手植如幘列。人咸曰誠有子。桷則曰是宜壽且傳。噫。世胄彫赫。夸者馳侈靡。卑者淪頽仆。幼儀雅言。耳目不相接。垂三十年。脫有能自樹植。皆野人簞子。惟魯不入繩墨。獨士直以故家兒。接受薰熟。而貴白甫身教簡易。故人皆愛士直。靜且和。足以蔚其宗。余亦愛士直。將挈而充之。使益有令聞。大德丁未。余官禁林。有言士直遵海東游京師。遲之不復至。己酉歸里。貴白甫泣且言曰。吾紹庭甫壯。以九月某日亡矣。其死也。遺筆敍訣無佞語。獨屬兄置後。以慰父母。明年春。兄果得男曰鑄。配汪氏。遂育以成其言。葬地在宅西嶼山。以辛亥十有二月某日寤。俾桷銘。謹按官譜。曾祖諱某。宜義郎。致仕。贈朝散郎。祖諱肖孫。朝奉大夫。戶部郎中。浙西提點刑獄。嗟夫。世患不能持身。既壯且脩。振衣康莊。御轡遠騁。其進莫可止。輪揉輒敗。卒歸于命。貴白甫秉德師古。迄逢不淑。莫紓其悲。以貌期稱。余復失之。天乎。是果不可知也。庸銘以慰而翁。銘曰。有燁者珠。復沈于淵。云誰尸之。蒼蒼維天。雲乘嶼山。兆食歸復。詔而兄子。以衍以續。

戴先生墓誌銘

先生諱表元。字帥初。一字曾伯。世爲慶元奉化州人。七歲學古詩文。多奇語。年十三。卽加冠入鄉校。從里師習詞賦。輒棄不肯學。諸父強之。乃游臨安。于時新定方向書。逢辰。廬陵劉博士辰翁。以論策表厲進士。得先生程文。大奇之。咸淳己巳。入太學。改歲以三舍法升內舍生。又踰年。辛未。試禮部第十人。登進士乙科。授建康府教授。越乙亥歲。由建康歸。遷臨安府教授。行戶部掌故。皆不就。積階至文林郎。大德甲辰。先

生年六十一矣。會執政薦于朝。起家拜信州教授。秩滿授婺州。以疾辭。至大庚戌三月卒。享年六十有七。先生在建康時。先處州通守是邦。朝夕互還往。先生眉目炯聳。慷慨自奮。欲以言語筆札爲己任。嘗曰。科舉取士。弊不復可改。幸得仕矣。宜濯然自異。斯可也。後二年。失仕歸剡。遂俾桷事先生。始盡棄聲律文字。力言後宋百五十餘年。理學興而文藝絕。永嘉之學。志非不勤也。挈之而不至其失也。委江西諸賢。力肆于辭。斷章近語。雜然陳列。體益新而變日多。故言浩漫者蕩而倨。極援證者廣而類。俳諧之詞。獲絕于近世。而一切直致。棄壞繩墨。焚爛不可舉。文不在茲。其何以垂後。先生深憫焉。方是時。禮部尙書王公應麟。天台舒公岳祥。師表一代。先生獨執子弟禮。寸聞隻語。悉囿以爲文。其文清深整雅。蓄而始發。間事摹畫。而隅角不露。施於人者多。尤自祕重。不妄許與。晚歲翰林集賢。以修撰博士二職薦論。而先生不可復出矣。維先子與先生總角相厚善。暨先生登進士。年盛氣邁。故舊貶抑者不敢自進。先子正色相輔。復以不肖孤。托于先生。誘之迪之。獲不失其身。往歲解官南歸。於是先子捐館。踰一紀矣。先生始愴然曰。先公之德。幸勿墜。嗚呼。朋友道喪久矣。過時而哀。桷實何敢忘。自昔孔門。首分四科。歷代之士。率不能兼有。尊德行者。後文學。世嘗病焉。先生爲文。尤多於忠厚孝悌之語。後之纂言者。其必有所考。夫文以勸遠。果能遠矣。而近者五六十年。或止百餘年。其不幸者。又皆爲水火燬沒亡紀。使誠盡傳也。則世有能名者。不一二數。然視今世焯焯所傳。又皆無是事。噫。傳與朽。始固不論也。曾祖辛。妣劉氏。祖汝明。妣鄭氏。考灝。妣王氏。世多儒科。伯祖杰。端平初爲宗學諭。篤厚爲時輩所尊。先生詩文若干卷。疾革猶手加繕定。以所居鄉名。

曰刻源集治窆張村葬以至大元年三月某日娶陸氏子男四初陽次紀後庚幼儒女四壻曰陸孟孫孫肖翁徐公說袁庚孫孫男女八始先生兩授徒于鄞于宜于杭其徒散處莫會初陽等謂從學最久而知吾父者宜莫如桷遂俾誌其墓乃泣對不敢辭銘曰

桓桓戴系立氏以諡信都九江集禮秉衛在漢國鈞守正忠毅別籍于刻貞德彌勵琅然孤桐不諂其逢浩歸衡門邈焉冥鴻二季重輝續其高風箋經暢隱雅言春容厥壤犬牙旁邑是著方門之支本茂葉附展世斯赫宗費攸輔誥誥餘慶聿踵先武振聲鋪華先生是承有燁者光不竦不凌在泮巖冠掩耳以行曲裾長襜祗繫其亨千塗競譌一轍交走正岐前驅白首莫疚發其粹精如瘖脫口如轡在手如藥在肘屢躓于艱秉禮益閒有泉潺潺有佩珊珊駕言東游曰知者天卒昌其文以終丘樊張原之柏先生手植彼高爲南彼鬱者北告而嗣子以順以則昭銘墓門過者必式

周隱君墓誌銘

先王盛時以三物教民六行之不脩則設刑以糾之是六者切於人道之日用故嚴以爲之防其理然也降在戰國彝倫益斁孝友著於列傳擁強賁持短長縱恣郡國作史者復傳其事豈誠有激於世乎納粟之令行虛文益張實不見於鄉黨執筆以揚人之美不僞則佞吁可懼也矣廬陵曾君巽申與桷同在翰林狀其姻家周隱君之行曰君諱天錫字極翁吉安路安福州人曾大父大成大父宗元平實自持以累舉恩授迪功郎臨江軍新喻縣丞兄九鼎篤信行歲饑能損粟直以售遇朋友急厄傾貲解援裕如也牟

內翰林領史事。將薦以自近。後不果。文丞相信公斬許可。扁其齋居曰信。太學博士劉君辰翁實銘之。是生隱君。嘗以詞賦上轉運所江丞相。讀其文。奇之。事親盡孝。侍疾治喪。悉如禮。以遵父志。其待於族姻。洽於鄉鄰者。彌有廣焉。性不事表襮。勸之仕。謝曰。吾求全吾初。遂因以自號。至元二十九年十一月年五十有二以卒。娶蕭氏。男長孺。將仕郎征東等處儒學提舉孫男三福。祺。禎。孫女四。延祐五年四月甲辰。葬柏溪之橫原。讀其狀。則知夫厚德之延非一世。繼志紹聞。久而彌光。泉蹇於山。木生於地。磅礴鬱積。有自來矣。君之遠祖廣。爲南唐節度押衙。積憲。爲御史。階金紫。唐廣明以來。有是官。曾君平居語不妄。孫禎。曾壻也。曾之先君監察御史。縣桂陽時。爲湖南主文。實拔君爲首選。事可證。若是。銘曰。有錦綉之有玉匱之。蓄兮續之。是用穀之。廬陵之原。豐碑秩秩。昭其幽光。詞不以溢。

楊府君墓誌銘

江南官簿大家。運統合一。緒墜牒散。流降不復可考。或者謂聲聞詭激。德不稱名。馴致是理。味其語。淵乎有旨哉。箕疇敘五福。首次以富。終之以考。終命而祿位弗敘。若是則尸祿位者。私善惡喜怒。鉤名挈譽。幸終其身。其禍可勝道哉。至治元年。余校文南宮。得一士曰張純仁。廣信人也。調鄞縣丞。鄞爲余里。會謁告歸。純仁踵門。以其舅氏之狀請銘。其受氏爲武夷楊氏。楊由侍讀學士徽之。翰林學士億顯後。有徙信之弋陽。今爲弋陽人。其曾祖諱崧。祖元龍。考汝翼。妣三世曰李氏。程氏。江氏。考能詩。有集曰醉吟。李君明通。敘之。君名謙之。字謙叔。嘗監麻沙鎮。後不復仕。其所從師曰謝公君直。純仁之祖教授君某。其事親。有誣

其考以重罪。君總角詣庭，直其寃。其居室，銖黍充糗，使善裕。其施于鄉，損粟直以濟饑，買田以助縣庠。其宅南有重巖水石，君能專美獨樂之。其娶熊氏，闔助迄成其家。子三：長昭德，次拱辰，先卒。季進德，孫男九，孫女六，曾孫一。其生在寶祐丙辰，卒以泰定元年正月某日，年六十有九。其葬在武石山，噫，所謂五福斯備者歟！其自號曰謙山，名字與號若不相捨，茲其爲延永也大矣。是宜銘。銘曰：

世以祿夸，我弗企之。積小以高，莫或躡之。巖巖長松，美蔭日疏。迄樂其全，弗僭弗踰。武石之山，因爾體魄。爰廣墓門，過者是式。

劉隱君墓誌銘

五經之學，由宋諸儒先，緝續統緒。詩首蘇轍，成鄭樵；易首王洙，東萊呂祖謙氏後始定十二篇。胡宏氏辨周官，余廷椿乃漸次第。書有古文、今文，陳振孫掇拾援據，確然明白。言傳心者，猶依違不敢置論。至天台劉君正仲，諱莊孫，始憤然曰：吾不能接響相附和，尊聞紹言，各爲論著，不沒其實。而先儒之傳益顯，所爲書曰易志一十卷，詩傳音指補二十卷，書傳上下篇二十卷，周官集傳二十卷，春秋本義二十卷。其論春秋爲魯史之舊，是則發揚先儒之遺旨，喜著書，能以詞藻達幽隱，復爲論語章指，老子發微，楚辭補註，音釋深衣考，而其所爲詩文曰芳潤藁，凡五十卷，和陶詩一卷，噫，多矣哉！學患不博，博矣，其必不能有以精也。士生于今，會衆以合一，由谷而之川，川以達于海，蓋其書具在，獵英聚珍，朝成夕上，敏而求之者，良不以爲艱。是則於劉君見之，君少學古文，湛深隱伏，不見其涯涘，落筆數百語，詩工次和，愈作愈平順，而幽

愁感歎。思其平昔。狀其巋窘。鑒燭清澈。物莫有逃遁者。性嗜酒。不解治生業。幼侍其父府君。自爲師弟子。從閩風舒先生岳祥游。唱和不輟。空林絕幃。目接耳受。一寓於諷詠。晚歲先會稽郡公。延入塾。教諸甥。桷相與論經旨。往復不避輩行。蓋君篤信周官。而不鄙。每置議。君亦不以爲忤。在太學五年。不善爲同輩文字。不獲釋褐。今其所爲書。先師尙書王公總而敍之。大德六年十二月某日卒。年六十有九。娶王氏。後七年卒。子三。長主一。早夭。次存翁。學翁女一。適董可傳。葬于士奧之龜峯。劉爲寧海儒族。八世祖世充。爲吳越王錢氏板授。官閩風里。有二劉。曰和叔。曰允叔。於君爲曾叔祖。有文名。不大光顯。至君父子亦若是。今遺書具在。詎果無傳也邪。曾祖某。祖某。妣某氏。其子存翁。嘗請銘。以久官翰林。不克爲。至是二十有四年矣。今復有請。愀然謝曰。隱君振華續光。將大有傳。耆舊漸盡。桷敢不自勵。銘曰。探微證墜。前哲功。後學剽襲。誣顛蒙。偉哉卓識。合異同。輪困卷帙。浩不窮。冥搜玄象。歌泐泐。弄筆爲戲。箋魚蟲。辟雍三黜。命莫逢。紀述有在。蓄極通。墓門永揭。昭儒宗。

曹士弘墓誌銘

褒貶論春秋。解經者失之。作史者祖之。則益失其旨矣。宋祚歷三百餘年。經國之綱領。治迹之盛衰。實書以示後。其義自見。深文巧避。多出其子孫。而爲國諱者。掩而益彰。沿襲不決。何以傳信。吾友曹士弘。甫深憂之。蒐撫遺逸。不替於昔時之議論。自成一。家。其貫穿出入。年經月緯。誅其私心。附以旁證。莫能逃遁。桷往歲亦嘗以是自任。故書燬廢。不復敢因微言。曰。帝在房陵。豈乾侯之例邪。外大夫不書卒。書卒者。其是

邪。士弘甫撫掌。大以愚言爲然。嘗約吾二人當必任是事。嗚呼。士弘甫今往矣。以余之識闇志荒。不復能有成矣。士弘甫讀書。目過卽成誦。理財養兵禮樂刑政之損益。折衷於古經。而以通今所宜行者爲之準。其見於用也。不卑於簿領。而志足以展用。取於友也。盡其所長。覆護以捨短。故舉世一皆以爲賢。奉親孝。事兄以恭。訓諸生。專席廣說。耳領心會。爭墮門受業。後卒致顯仕。初爲郡史。燕公公楠爲大司農。辟以自近。歷婺州。純孝。慶元。丈亭。廣德。陳揚村。杭村。巡檢。後入銓曹。復授陳揚村。揚村父老。咸曰。是嘗攝吾里者矣。曹君善撫字。今年饑。必賑我。我何之。君諱毅。武惠王裔孫。五世祖某。從隆祐太后避兵。過廬陵。因家焉。曾祖某。祖某。父某。有詩集六卷。祖妣鄒氏。妣羅氏。鄒氏。以叔父某太學釋褐。恩封孺人。所爲文若干卷。纂言行編曰。鈞玄凡五十六卷。疾革。命諸子曰。必返汝祖母故塋。吾魂氣無不之。得地卽埋我。卒以至大三年四月某日。年五十有二。子男五人。汝霖。今爲兩浙轉運司書吏。汝舟。饒州器資。宜州。皆以秀才舉。馳以醫業入仕。幼桐。孫女一。適劉某。先卒。孫男女七。嗚呼。人嘗恨位卑。齷齪媚上。甚則策功利以求進。名在罪籍。不自悔。王公貴人。持與奪。生殺身死。無足稱道。較士弘所負所傳。得失爲何如也。先師禮部尙書王公應麟。爲文。錢之曰。闕里高第。冉有用矛。樊遲爲右。士弘爲此官。文武同方之道也。侍講學士張公伯淳。則曰。伯淳官慶元。士弘在慈溪。與之友。不敢吏朱雲也。汝霖。汝舟。皆能世其學。泰定二年。汝舟以書抵余求銘。實不敢辭。銘曰。

弛也不食。我心孔悲。聿求王明。以策以馳。輪囷知聞。如山簇雲。纂史闡名。不屑於文。緝墜紹緒。執筆是紀。

年不稱德。傳世則偉。作銘允哀。以詔我同志。

陳縣尉墓誌銘

咸淳閱十禩。諸縣獨奉化號多士流。出入太學。上南宮。亡慮十餘人。于時蜚聲秀穎。旁縣皆斂手避讓。一時傳誦習讀。謂清選不歲月可馴致。未幾皇元合一。皆失仕歸里。挾策授徒。疎糲自給。俱不能享中壽。子弟不自振飭。復歸爲農。陳君亦咸淳甲戌進士。不自矜襮。接幼待賤。謙挹愈加。混跡蒿翳。不知其爲故官。而得年且八十有一。有子漢。復能以儒自守。其視前數公良愈過矣。君諱觀。字國秀。嘗調臨安府新城縣尉。十世祖棠。尉奉化。因占籍焉。子孫日蕃。其最顯者曰太學博士著。於君爲兄。博士倅貳臨安。君館于其家。君之考承務亦在館。旣策名。客館其兄。復賀其父。人咸榮之。晚歲足不入城府。州爭迎致。率諸生以請業。君一至卽謝去。徜徉巖壑。侍博士窮幽抉奇。連唱屬和。有帙曰棣萼集。其自爲詩文曰竅蚓集。嵩里集。延祐五年三月。疾忽作。猶力書中庸一章以授漢。是月某日卒。祖諱某。妣戴氏。以守節著。事見州志。考某。承務郎。妣戚氏。董氏。孫男二。時說。時敏。孫女一。已嫁。次未行。今葬剡源鄉畢駐里。祔于曾祖迪。功某之兆。銘曰。

日垂崦嵫。亦旣見斗。實命不逢。怨則屢疚。布衣便便。迄享大年。執其韋編。戒子于傳。維陳令族。詩書是續。作銘昭昭。以告必復。

大德七年。擢官翰林。史先生以書見貽。不獲領。後二十年。子璧孫。囊其書藁以示。反復痛悼。策勵于楫。爲甚重。今撮要而表之。曰。斯文剝喪。餘數十年。師表郡縣。學者應格則得。未嘗于其人。後生不說學。亦未嘗知學。剔僞務實而挽之。古子宜勉焉。非可以虛談冀也。又曰。吾將死。得子文表于墓。楫拜手讀之。泫然以泣。先生於外家爲舅氏。猶記拜先生於獨善坊。論宦族纏屬。文詞顯著。獨缺自吳丞相開新河。有相者曰。邇後當踵有之。甥宜自重。先生於諸經。窮探微旨。證墜緝缺。不溺於諛聞。剖釋正大。而折衷一歸於前者。論古今得失。必探情僞。以暴其罪。正色憤悱。若造庭而受其責也。爲文遼古。不雜異說。手抄口講。更僕不能以盡。孝悌遜讓。知其出自然也。先生諱蒙卿。字景正。生而奇頴秀目。七歲善屬文。年十二。入國子學。通春秋。周官經。復兼詞賦。江文忠公萬里常參政。挺時爲大小司成。器待之。咸淳元年。登進士第。授迪功郎。復州景陵縣主簿。呂少保文德帥鄂。檄入幕。呂命先生勉蜀帥溫和解正陽圍。溫疑呂猜阻。不肯發。微語撼之。卽就道。凡所需器物。一夕以辦。溫實先公帳下校。卻立曰。史監軍誠有子。調穿山鹽場。諭義勸輸。戶不知有筮。榷十年。改江陰教授。復改平江。至是不復仕。故其詩文多感憤自喻。禮部尙書王公應麟嘗勉曰。思深辭悲。學陶靖節。其得之。維鄞史族號相門。曾祖諱泚。蚤夭。贈中散大夫。祖諱彌鞏。司封郎中。贈少師。司封以儒學致顯。當貴盛時。獨卑退自持。鄉人稱爲獨善先生。妣臧氏。華國夫人。考諱肯之。中大夫。湖北提刑兼知常德府。贈太中大夫。妣趙氏。周氏。碩人。太中熟邊事。折衝料變。有大帥才。時宰尼之。太中在湖北時。謁告歸省。從巴川陽公。臣學易春秋。一年復歸國學。乃中上第。士常患固陋。株守皓首不寤。先生

識足以窺淵懿。經緯一原。合師友之旨。老而彌實。確而不懈。故其成就若是。自號靜清。晚歲罹厄。窮講道不輟。從者益衆。天台多名山。心樂之。僑居者八年。大德十年七月某日卒。享年六十。疾漸革。語諸子曰。我死必歸葬。不能得資。良累汝。汝有志。其果能成也。是歲十有一月。柩歸祖墓。明年葬于陽堂鄉穆奧之原。娶陸氏。朝請大夫將作監合之女。子璧孫。塋孫。塋孫。臺孫。女伯侄。適葉信公。夢鼎之孫。揆翁。仲忱。適紹興中書舍人潘公良貴之曾孫世演。二女未行。有文集二十卷。易究一十卷。託永遠於少賤。誠不敢承命。歲月逾邁。而璧孫能遵守不貳。奉遺言以請。曷敢以不腆爲辭。銘曰。

貞絮陸沈。志裂金石。秉言無郵。厄則孰職。驥伏于襄。不稱其德。塊獨結約。忿決胸臆。持九障瀾。盡瘁不休。卒昌者名。屢空靡憂。生爲完人。歸藏于丘。有子紹學。曷怨以尤。

清容居士集卷第二十九

墓誌銘

浦經歷墓誌銘

大德丙午。梅與吳郡浦源如淵。同佐史局。史局總翰林。職清簡。屬筆將旣。輒羣坐臧否今古。如淵訥不出口。一日正襟瞪目。援酌是否。纒纒數百語。經史綜錯。深切治道。且曰。吾家君重然諾。慷慨子歸。且往見是歲。還吳。始納謁焉。見其設席尋丈。車屨沓戶限。茗絕觴舉。輒口數州郡靡敝事。傾耳點首。皆僑寓達官。奇其言。將引以爲他日助。未幾。授漕運府知事。朝貴人俾乘驛來京師。昌言漕計十數事。不便。朝從其言。卽陞爲經歷。壬子歲。梅留吳最久。遂益得奉議論。痛言田稅民役。上下交困。乏將繕治。其說於素所傾密者。于時以婉語止之。曰。害不什一除。旁出苛擾。殆將重病之。君立悟。乃止。後授黃州錄事判官。延祐乙卯。君年六十一矣。嘗謂知己多。行事少。平時措念。挺挺可表著。迄莫能自見。一有委使。排根抉蠹。將欣然盡瘁。方受檄推考。而卒以疾至。大故實四月庚午也。嗚呼。成周以三物教萬民。降于司馬。遷憤世嫉邪。獨致意任俠。君周於事物。激不近刻。任重致遠。出戶而日昃。噫。幸歟。其不幸歟。浦爲吳郡著姓。君諱椿。字□□。世家崑山州。曾大父某。大父某。植德潛闕。父某貧而好施。君少試吏。以曲直視事。不肯有高下。簡易絕城府。解排紮徽。磊落輒自許。壯歲恥同凡輩。始辟漕運府史。熟其利害。府薦于朝。爲照磨。三遷爲府經歷。晚授

黃州而志意莫遂。詎命也夫。娶陳氏。男五。長源。以編修官授承事郎常熟州判官。次厚。與陳夫人先七歲卒。次湜。浩。津。女嫁同里嚴震。孫男五。孫女二。六月乙酉葬長洲縣陳墩之原。銘曰。

璞隱于荆。彼士泣之。驥伏于車。曷予繫之。成者匪天。爲者匪人。不成不爲。其風肫肫。聿昌其始。有子文偉。高丘永安。是謂受祉。

司天管句焦君墓誌銘

長安焦氏。世遠軼。莫究宗譜。有諱紹先者。金汰武時。始著進士籍。生子繼祖。爲河南招討使。招討生餘慶。第詞賦科。仕至中順大夫雲陽縣令。金將亡。國勢蹙。債日挈。都南徙。達官重族。棄播不自保。雲陽號儒家。乃讀建除候占等書。察便利生死法。爲隱避計。死未幾。有子曰永。字某。益究術自秘。天兵下陝。率里閭。擊屬二百九人。道金洋。入蜀門。蜀附定。悉完聚歸。後家岐陽。遂以術顯靈臺。因官焉。至元庚辰。靈臺卒。年六十。有八男。二榮。陝西四川陰陽提舉。顯。廣元路歸興倉使。女一。適輔某。孫男四。澤。臨洮府稅務大使。既將仕。郎同知益良州事。湜。岳州路陰陽教授。沈。延安路陰陽教授。其葬在咸寧縣龍首鄉南岡。合配胡氏。祔大德丁未。孫沈奉集。賢。宋公所爲先塋碑。與靈臺君之事狀。謁某京師。且曰。吾祖不顯于儒躬。遭險艱。食藝保緒。晚歲聚經史。探玩意。若有俟。性溫重。無忤色。紛難急。乏力盡不瘁。諸父兄。嶄然自持。承芬振華。挈挈自厲。匪我祖先德。疇克有賴。敢以是乞銘。銘曰。

起儒維曾。逃艱以承。魄藏止止。昭爾孫子。俾復其始。

滕縣尉徐君墓誌銘

君諱之綱。字漢臣。金以詞賦舉進士。君爲詞賦。大有能名。會金將亡。不得試。作賦說以示學者。窮幽闡微。合金宋體。指摘昔人鉅作。巍然不少讓。上論隋唐。曲盡幽眇。久而曰。是果爲學邪。益探道理。以河南二程。江南朱、張、胡、蔡爲根柢。窮春秋易二經。其言春秋失始三傳。左氏誣爲甚。常事不書。聖人之旨也。易更三聖。麻衣誠僞書。夫子十翼。功竝日月。其言與朱文公合。當是時。南北蓋未混也。意識卓絕。尙友於千載。其言論金士疑之。宋號以儒立國。論亦如君言。其所爲書。東齋默志三卷。皆經說也。通融賦說三卷。舉子學也。麟臺雜著七卷。其所爲詩文也。皇元略中原定地。戊戌歲。始招輯儒士。君以明經選益都。于時李璣以諸侯兵分省。君以府學教授佐省事。璣喜儒。間問攻戰成敗。陰蓄甲士。習勞苦。君講經曰。使民以時。相君不知也。璣默然。又曰。平王威烈。周之衰也。戰國之士。知諸侯而不尊周。唐世河北將士。尊藩鎮而不知有唐。其言簡直。遂黜爲滕州滕縣尉。讒者復以默誌羅君禍。後璣果就誅。而君亦已下世。中統四年八月某日也。年七十有五。配李氏。郭氏。嗚呼。崎嶇兵塵。士悉以童習自守。磅礴河漢。橫流塞而天源深。非君其誰邪。淄川楊公序其文矣。君世家單州。後徙濟州。祖鐸。父革。俱金進士。配翟氏。子敬。至元十三年。中明經。無祿。卽世。孫天麟。十七年。亦中明經。次鳳。以積勞爲益都路臨朐縣尹。今承務郎慶元路總管府經歷。次士龍。代州儒學正。曾孫若干人。鳳靖共宜官。愀然言曰。祖父節行經學。先哲推重。子嘗爲文字官。願誌墓道。遂讀其所爲書。以敘。乃爲銘。銘曰。

魯聖絕學蕪榛管曲說恣臆紛翮翻浮聲急響曼以繁青紫決拾靡覩顏夫子勇志開冥頑手持寸膠清
渾瀾雲陰駭霽白日還佐鎮陳誼數斥姦拂衣避席彼構譏寥寥道統孰異分正轍前趨南北貫厥功茂
著儒碩先遺文傳信銘永刊

龍興路司獄潘君墓誌銘

元貞元年梅掌呂成公麗澤祠于時壽俊有數公能言乾道淳熙遺事嘗曰麗澤選不輕二潘君真名士
子繼二潘亦僅僅焉大潘君吾里人以介直忿世死小潘君弼良輔處之麗水人介亦相近氣邁年盛用
世必得善譽子善識之未幾良輔來金華望之魁偉壁立瞪目拱手廣席參錯未始出半語稍論古事輒
躍然纏屬穿貫握手曰大潘君死吾與子真交承矣後游京師授贛州教授見中丞崔公議論剴發相感
動關絡解剔不爲翕翕附中丞喜聞四方利病卽奏授廣東廉訪司管勾架閣兼照磨是後余亦入爲太
史屬臺使者旁午入奏事咸言良輔有御史才廣東副元帥囊橐峒寇稍廉察卽縱寇搖動斂手弗敢問
遂悉發其姦獨德慶路官逋糧三萬石劾具幕長不法數事聞于臺立罷之監司欽察公悉付以事副帥
益鬱怒誘引亡賴誣讒會省臺停其職而以君劾罷者復所居官未幾御史言論劾者罪著不宜復然君
卒以是去江南行臺御史列署薦君宜久任憲職于時崔公已卽世不復任君矣大德十年復爲贛州教
授以昔之治廣者爲準開田築宮訓士嚴整力請于官而復其役皇慶二年授龍興路司獄不卑其職悉
疏宜行者以盡心焉部使者侈公憲府舊屬命治佐劄專利者凡得八百人悉除去之會侈公去官不逞

復以他事相誣誤。強訴者引君。然君自是抑氣不能食以死。嗟夫。士患不得名。名與謗常角立。昧昧後福。善不近名。誠有爲而言也。若是者君幾近之矣。君族祖父曰叔豹。曰杞。世儒科。皆至二千石。曾祖恕。樂道不仕。大父屋。太學進士。修職郎。平江府吳江縣丞。父應發。薦于鄉。文行瑰偉。士尊稱之。君幼孤。母項氏。招師教授。俾植立。其爲文辭。浩漑勢盛。衝激巖嶽。風止瀾靜。卒不露飄泊。其善養氣者與。所爲又號宜山集。若干卷。讀易。管見四卷。詩一卷。藏于家。元配何氏。子二人。曰龍吉。鳳翔。女三人。長適常鑰。次林定老。徐天祐。再娶陸氏。子二人。鼎臣。衡。孫女一人。適林街。三娶陳氏。女二人。尙幼。曰昇。曰鑑。皆庶生。孫男女各四人。君卒於延祐口年七月某日。卒年五十有八。槨在翰苑時。嘗以君薦于承旨程公。程公曰。吾固知之。得無以南士累乎。相笑而止。至治元年二月。承徵至京師。預考禮部進士策名。得林定老。後登上第。授奉化州同知。定老踵門拜。且言曰。潘君實婦翁。先生嘗知之矣。將以今年八月庚申。葬朱溪祖墓。敢以銘請。又言婦翁嘗從先人。先人卒。定老生未周。矻矻撫字。終以女妻之。由是悲且歎曰。師友道喪久矣。是尤宜書。銘曰。

江陵儒學教授岑君墓誌銘

長紳戢冠。日出脂韋。莫望其逢。委蛇以嬉。白駒在谷。不屑不辱。決臆過都。執紼其足。生人匪艱。成之實難。九泥障流。彼駛者繁。氣直以堅。維德之完。謂隘不由。其名奚傳。

慈溪黃宗卿震之季子。叔英彥實甫。壻餘姚岑氏。咸言岑氏善擇壻。彥實館其家。以詩書授子弟。彬彬于

于鈞深纂玄融液品節各就條貫掉鞅於詞場者尤宜焉。延祐五年岑君良卿以詩義上禮部第二。榜時爲殿試讀卷官。定甲乙七年其弟士貴貢于鄉。榜以至治元年再入集賢預校文。選詞賦工者擢前列。暨拆名則士貴也。國朝治定。踰百年始立科舉。江南行省有三。而襄郢東西淮之士亦隸南選。三歲止七十人。登名上于庭者三黜其二。岑氏連取之。盛矣哉。論德考實必推其前人。士貴懷牒南歸。以其先府君之狀來請銘。君諱翔龍。字雲起。踰弱冠卽起家爲高節書院長調和州教授。又調江陵教授。幼警敏。能文辭。性慕高潔。以禮自持。植廢舉缺。罔有怠事。鄉里稱孝謹。事大府能使貴盛者咸愛重之。大德九年卒。年四十有五。吏部教官格年踰五十始得入州教授。州不滿三十而接踵嘗數百人。十五年始得授。且守缺近三四年。遠至七八年。故多不能食祿。而陞于路者非耆年則下世矣。君以盛年徧歷。宜洩于民。不得年以沒。前佚後窒。若有憾者。未一紀。兄子登進士。又三年子亦進士。較其得失。是則亦奚有憾焉也矣。娶王氏。先九年卒。子男五。文仲。朝瑞。爲伯父後。士貴。今授某官。季德盛。楚材。女一。適鄞范某。至大元年葬於上林鄉。召與之原。古者銘藏于幽。後揭於墓道。懼人之弗先見也。禮生於人情。弗忍焉耳矣。乃表以銘曰。蒼姬展親。岑亭啟封。棘陽專居。傳漢益隆。矯矯舞陽。佐運闡功。後與儒碩。錮禁以終。定藉會稽。支居鹽官。三相佐唐。偉績彌刊。或鳴以詩。載車和鑾。降宋中微。其譜實完。蹇兮在山。不駸不憤。卒達于川。百折混混。執導其先。孰開其蘊。肇者不居。來者益振。執券獲酬。雙壁是陳。載考令德。其馨網緼。我銘以昭。益勵後人。

君諱從。字從之。霸州信安縣人。壯歲秀整。植聲節。與人交。不爲儉薄意。拯其急難。里人推德之。至元十三年。爲河間清鹽使副。後陞正使。治弗煩擾。而政日以理。始君從弟彬。弱冠事裕宗。後爲工部尙書。官寔顯。從之曰。吾郝氏由大父宛平君。多惠政。後宜有顯者。徵在尙書。吾仕宜已矣。會得末疾。息心斷家事。調佐寒暑。力補治。策杖闔里。如平時。踰二十年。嘗謂其子志善曰。才能不如古人。擇今世賢公卿如古人者事之。斯近之。翁赫取貴。豈非進身本也。志善從太傅丞相之子。大夫游。始爲北郊署丞。爲監察御史。而君與世。嗒然益若相遺者焉。延祐五年十月某日卒。年七十有一。噫。士患不知命。逐日希影。挈挈然不返。若君能知止矣。而其弟參大政。罷歸閉門。幾十年亦不出。今拜大司農。郝氏之昌。殆未易量也。考諱德仁。妣李氏。宛平縣君。諱政。以參政贈資德大夫尙書右丞。追封薊國公。諡康靖。賈氏。薊國夫人。配劉氏。二女。長適楊居義。次適集賢照磨李忠。將以十有二月某日葬宛平君墓。左御史來乞銘。銘曰。始奇終闕。觀德日溫。調言衡門。不華以尊。曄曄大椿。灌膏培根。弗利其身。利其後昆。

翰林學士承旨贈大司徒魯國王文肅公墓誌銘

翰林承旨贈大司徒魯國王文肅公。至大三年。六十有六。薨京師。假葬于城東隅。至治元年。其孤翰林待制士熙。始克奉柩。以某月某日葬東平祖塋。孤山之原。士熙拜且泣曰。墓上碑。則父友翰林學士陳公儼屬比銘之矣。今葬日薄。知吾先公莫若子。幸誌其歷官行事。納諸幽堂。楨不敢辭。爲之辭曰。公諱構。字肯堂。年弱冠。以詞賦入鄉校。賈文正公一見器偉之。禮載以歸。俾教授其子。遂來京師。至元十一年。授翰林

國史院編修官。由院中敍遷。應奉修撰。陞侍講。進翰林學士。訖承旨。佐丞相府爲司直。歷吏部禮部二郎中。太常爲少卿。於臺外江北淮東道提刑按察使副。內治書侍御史。入省參議中書省事。復出守濟南。公之在翰林也。辭命詔令多所譏述。其最傳于朝者曰。世祖皇帝諡冊。追諡太祖冊。武宗皇后冊。於實錄。預修世祖成宗兩皇帝定武宗上尊號。親享太廟儀。在太常考輯因革有敍。其佐丞相府。剗刮蠹弊。更始選士。丞相齊魯公信從之。爲治書時。值桑葛擅中書政柄。嫉方直士。檄公偕翰林承旨魯國文貞卜忽木公。覈究燕南錢穀約一月治辦。公先事計畫。不以累魯公。會桑葛誅。乃得免。其按淮西。不切切近名。而吏亦不敢慢事。治吏禮二部無缺。緩同列見公署事。不復視成牘。以行參議府六年。一時執政聽南士陳利便。搜括田賦。時平章政事何公榮祖與公正色不少讓。摧萌折貪。卒俾其謀以寢。始天兵平宋。詔徵賢能。李學士槃同受旨。公至杭。首言宋三館圖籍。太常天章禮器與仗儀注。當悉輦歸于朝。董趙公文炳從其言。今宋實錄正史藏史院。由公以完。守濟南。寬貧民官逋。修閔子祠。復學田。觴詠自娛。而訟益以簡。承旨李公謙幼師之。遷應奉。卒推以先。始受命。勤敏通博。一時鉅公皆屈己期獎。後卒與相竝。史館辟署。亡慮數十人。今相躡清要。皆門下士。其爲文。閉閣詠諷。落筆纏屬不止。於王言爲尤長。臺閣故事。資公始能奉行。事兄戶部侍郎桓。如嚴父。惇姻睦宗。在中書。迄不肯私其親。人益伏之。同里陳公儼爲孔顏孟教授。年幾五十矣。入徵拜監察御史。未幾爲翰林直學士。蓋公昔嘗薦之。王愷年七十爲編修官。公請于朝。以待制致其事。資歷循敍。銓衡所宜守。文字官陞擢。詔旨具在。後爲繼者。緘口不薦一士。視公誠可愧也。公之系

由瑯琊居東平。自八世祖爲宋司農卿守鄆。因家焉。魯祖瑀登金進士第。官奉訓大夫。滄州無棣令。妣范氏。祖鐸以公官承旨。贈正奉大夫。太常大卿。妣杜氏。臨沂郡夫人。父公淵。贈昭文館大學士。資德大夫。妣薛氏。瑯琊郡夫人。昭文當金亡時。有兄三人。攜妻孥南徙。昭文私自念王氏大墓。盡族以行。孰與守。下車伏草莽。兄呼其名第。不復得。後騎迫。大慟以去。昭文傭保自活。迄全其墓。厚德勃興於公見之矣。娶薛氏。魯國夫人。是生士熙。再娶許氏。皆先卒。晚歲得二子。士黠。士然。女一。嫁薛晉。士熙能文辭。有聲。將大用於世。推薦賢之功。王氏殆未艾也。銘曰。

德充智周。世莫與儔。士林之標。獎士無方。譽施珪璋。孰阨其遭。文鳴盛世。金石雜比。厥聲四昭。子也允文。戰兢紹聞。嗚呼乎。公之名益以高。

磁州知州程君墓誌銘

程君諱翔。字鵬舉。以孝友聞于州里。後其子若弟官江南。恂恂愉愉。夙然異衣冠常流。於是江南之士族。咸取以爲則。嗟夫。世降俗媮。能竭力以養者有矣。友于之乖。君師之嚴。不能以戶化。若程君者。發於良心。成於身教。是宜揭豐碑以昭示薄俗。按其狀曰。世家廣平。大墓在城西南。兵難譜軌。獨記其父名約。是生三子。長卽鵬舉。仲曰翺。仕至僉浙東廉訪司事。叔曰翼。吉州治中。二季以官業表著。皆君之教。君綜家治。生服其勤勞。俾弟悉意問學。聚書延師。靡密叢雜。一不使亂意。弟則曰。匪我之能。維吾兄之成。其事父。承接意指。日侍食候。可否。或卻食。卽不敢食。懷甘割鮮。斥幼者避席。以立。佐治湯液。時其寒煖。卒能以上壽。

終既除喪。謹上冢禮。修誠厲行。分寸不使越繩墨。鄉閭尊之。昭文學士張公孔孫集賢學士劉公遜曰。吾徒不能以卓行薦諸朝。是誠有愧。年七十有一卒於元貞二年正月七日。葬某鄉。娶張氏。子四。良弼。良輔。良佑。良佐。君疾革。呼諸子曰。父死異財。違古禮。慎遵我訓。若君者。懿德斯備。而復以囑其子。程氏之澤。良未艾也。良佑始仕在中書右司。歷參議府戶部宣徽院。改授太常太祝。出爲鎮江常州推官。浙東道宣慰司都元帥府都事。甫解職。以選守令。授奉政大夫上都路興州知州。孫十人。孫女九人。良佑來請銘。君弟之子良能。松江府橫浦場司丞。良士。温州路永嘉場監運。亦曰伯父事實將湮佚。宜速銘以詔後。君以推恩贈奉政大夫磁州知州驍騎尉。追封廣平縣子。張氏追封廣平縣君。銘曰。惟民初生。其仁腴腴。靡盬恣情。有戾彝倫。展也磁州。執德養淳。奉盈臨淵。踧踖以遵。陳饌在堂。手函脆新。候顏以趨。厥容孔溫。爰用則之。施于家人。濟濟雁行。厥聲四聞。永裕是嗣。振于朝紳。城南之塋。有大維樁。爰勵薄俗。表茲堅珉。

榮祿大夫大司徒特進饒國吳公饒國夫人舒氏墓誌銘

至大三年。武宗皇帝廣孝錫類。以翰林學士中順大夫致仕吳公克己。特授榮祿大夫大司徒。封饒國公。妻舒氏。饒國夫人。夫婦同日受封。其子玄德。真人玄教嗣師全節。歸饒州安仁縣。下馬入里門。奉制書跪堂上。二老人卻立。望闕拜命。誠覓軼前古。延祐元年。壽八十七。仁宗皇帝遵先帝故事。錫上尊文錦。以尊顯之。表署宅里。榮耀極致。人子之崇修其親者。茲亦備矣。玄教嗣師實開府大宗師張公留孫之大弟子。延

祐六年。公與夫人壽八十有五。五月丙辰。公薨。全節號泣不食。得請于上。倍道星馳以歸。十有一月某日。饒國夫人相繼卽世。嗚呼。生榮死戚。訖同以歸。盛矣哉。人子之事其親。情至矣。而養弗能以盡。養足以盡。而祿弗及者。千萬焉。貴極於王侯。喪追之禮。見於墓下。則凡通顯之事。親者十無二三焉。合唐宋譜。胄幾七百年。具慶僅一二見。吳氏之德。胚胎磅礴。是誠有攸來矣。喪禮莫嚴於儒者。飾情表行。哀不足而溢於禮者多矣。玄德力行而兼有之。茲難能也。至治二年春。全節泣且告曰。將以九月某日。合葬于崇德鄉山田原。願述我先公先夫人之世系而銘之。隧道有碑。翰林學士元公則爲之矣。古者墓而不墳。藏銘于幽。懼世之久而弗知也。視其姓名。有不忍人之心焉。後之慮其親者。則曰立於墓。人之見之者。不忍矣。何藏焉。碑於隧。斯敬矣。銘於墓。斯仁矣。謹按。番禺吳氏。皆祖番君芮。饒公會祖岳。祖夢旂。父鑑。追封某官。諡文靖。妣陳氏。追封饒國夫人。公字祥甫。卑讓自持。不善者避之。善者從之。身貴矣。禮鄉黨。以和視。後進煦然。以獎誘。觴至益持重。戒其子侍帝左右。毋以我毫爲往返。夫人舒氏。諱妙真。世儒族。祖某。父某。公蚤事舅姑。盡孝敬。晚歲主祭。享親。滌濯。遇諱日。淚涕滿頤。睫內闔。姻黨咸儀則之。高堂齊眉。人以爲福。德具備。何憾焉。子四。詢。承事郎。誠蚤卒。叔卽玄德君。季全義。女二。嫁某官。孫男五人。善集賢。修譔。能文詞。孫女若干。曾孫男女九人。銘曰。

抑抑吳伯。植節秉仁。毀形以逃。克昌胤孫。傳國中圯。是生番君。得其民心。徙王策勳。代有顯賢。支庶日繁。廟食演裔。饒惟邇親。執經武夷。源同派分。是生饒公。守謙以文。大盈彌虛。黜驕鏡昏。厥配氏舒。廬江之蕃。

相唐始興。矢辭派騫。楚吳犬牙。譜諜是遵。德儀媿賢。象服粉粉。訓子以忠。不私其門。顯晦偕老。死生同根。道以易傳。德以簡尊。悼哉令宗。允顯皇元。

海陰陳處士墓誌銘

咸淳元二閏。吾里陳公肖孫。以善政事驟用。由大理寺丞知嘉興輔郡。未幾兼浙西提點刑獄。踰年兼度支郎官。人謂且大用矣。會旁郡山寇起。罷歸。不數月疾卒。喪除。其子嵩伯。候平章賈某于馬前。平章入政事堂。謂宰屬曰。陳肖孫一廉可取。宜與致仕恩官其子。當上奏。餘人勿得爲例。既授將仕郎。宋社亡。不復可仕矣。鄉人尊之爲海陰先生。先生少歲力古學。不屑事科舉。聚羣經師說。商略讐證。下逮旁聞曲記。遺言懿行。譜諜星曆之說。皆手抄。與梓本書相竝。篤於信行。傾急解難。道里寒暑。不廢其學。深湛詳博。尊聞傳信。懼悟解者汨其真。嘗禁止之。非其友不友。既友矣。必反覆護衛。不使有議之者。友或叛去。先生泊然不爲言。人益服之。桷先處州府君。於朋友義尤敦。而先生行事亦相近。故交好尤善厚。先府君卽世時。來城中。愛撫彌厚。嘗曰。汝父宜有後。昔百受欺。今詎使一無報邪。大德五年。桷備翰苑屬。後屢遷。先生喜。盜眉睫曰。吾所期誠不妄。延祐六年二月。得微疾。作書與常往來。戒勿用浮屠事。且命桷誌其墓。幸以故人子何敢辭。先生字貴白甫。世居奉化之鴉鵲山。卒時年七十有七。葬某鄉某原。妣方氏。封安人。曾祖聰。謀妣孫氏。祖師稷。以度支明堂恩。贈朝散郎。妣陸氏。鄔氏。追封安人。妻樓氏。子二人。紹廉。紹庭。孫二人。先生仕不逢時。學不展用。熙熙然以壽終。於後人有徵。可無銘以俟。銘曰。

駕車康衢佐夔龍。日昃之離命不逢。寤言弗告隱志充。畚田瘁耕黍稷豐。考覈琬琰手澤功。大椿養齡蔭
龍嵒。靈璞久闕合鴻濛。是式是似後當隆。

處士黃仲正甫墓誌銘

嗚呼。自聘舉之法疏。人得以易售。抱德藝者羞之。後法始密。益不肯自進。有薦之人不盡識。或曰。彼士奚
足取。又或曰。士若是者衆。使一取之。將曳踵以至。桷官翰林最久。故有若吾黃仲正甫之賢。明經博聞。卒
不能啓口以告于當路。嗚呼。今亡矣。果使無傳。則誠有罪矣。仲正事母孝。居家無語笑聲。待弟姪不使有
忤意。持敬讓以禮。宗姻鄉黨長者洽之。幼者慕之。其學汪洋暢整。經以載道。必考其精微。幽顯之委折。於
史。辨疆理。氏族。制度。官名之興廢。旁搜博徵。曲而通。確而明。故爲文辭。纒屬不能以窮。將臻乎極。而始底
于用。欲以名世者不在仕進也。有司三奉科舉令。卒不應試。而嘗以其說授于其徒。昔者聖賢憂道。不行
於時。由列國言之。誠遇焉斯得矣。今天下一轍。達而上者。其說具在。布衣焉以遭逸舉。進以秩祿。應縮在
下。不能有爲。仲正之不屑者。在是。儒病通乎古而不知今。昔之在上位。顯重名。其行事執愼。後世甚者
竊高爵。講說他方以鈎徵召。仲正嘗勃然不喜。然竟不假以年。則誠可哀也已。仲正諱叔雅。父震。宗正少
卿。提舉浙東常平茶鹽。咸淳間。號名二千石。晚歲高遜以卒。仲正不仕。繼志焉耳矣。世居慶元慈溪縣鳴
鶴鄉。曾祖世珪。祖一鶚。贈朝奉郎。妣趙氏。配鄭氏。司農寺主簿大澤之女。子二人。正倫。正倩。今葬章家與
之原。延祐七年五月二十二日卒。年五十有四。銘曰。

闕觀稱貞。舉世顯榮。肥遯靡求。孰爲之升。君允矣恬。寧奇漱英。求知者天。卒韜智名。有年不修。莫究其成。我銘孔哀。以永厥聲。

將作監主簿蔣公墓誌銘

朝奉大夫將作監主簿蔣公諱曉。字堯臣。淳祐七年進士。以至元二十四年卒。年七十有一。葬奉化州長壽鄉邵輿之麓。曾祖樞。朝奉郎通判台州。贈中奉大夫。祖如愚。朝請郎通判隆興府。贈太中大夫。曾祖妣張氏。楊氏。伍氏。贈令人。祖妣諸葛氏。封安人。贈淑人。考嶠。文林郎池州貴溪縣丞。贈朝奉大夫。妣湯氏。贈宜人。既葬三十有六年。長子景先卒。無子。次子昭先。次其先德家譜來請曰。蔣實望族。七世昭穆皆鉅公。著銘罔缺軼。我先人在時。子以子孫禮見。且承學。今子在太史。非子銘其誰宜。桷不敢讓。銘曰。

蔣姓宗姬。亾亭漢侯。居鄞發祥。唐季是稠。厥孫評事。清淨急施。有嗣金紫。益振以義。忠肅陳公。謫明絕朋。俾子允師。連桂以登。曰高祖考。宰邑孤高。相京傳私。卒忤以逃。是生台州。繼以隆興。倅貳有聲。再世是繩。誅誅貴池。丞邑退卑。厥兄諫議。職穹聞馳。惑弟有孤。將授門功。公謝弗受。迄升南宮。試簿仙居。復攝寧海。卻妖節浮。民靡匱貧。入理京獄。直囚不刑。探其隱姦。大尹以驚。出邑武進。遣易分水。嚴盜獷張。召公顛石。摩磔羸頑。請粟食賑。楮帛賦繁。直疏罷進。神存正祀。學飾新象。彼厯者叟。祠祝泣想。爰倅于越。撫民彌加。計臣增輸。牘諫戢諱。佐餉既終。監舶洩溫。香珠翠毳。罔游于門。輯爲成書。以儆墨悞。彼相嫉廉。改司甌函。白壁襲緹。卒罹其讒。晚佐繕營。國步日窘。整寶食貧。絕見喜慍。少窺刑書。復入詞學。記言博精。灑墨清華。

譜書庚申。文紀甲子。視階郎中。澤家嗣。歲行丁亥。九月庚戌。飾巾辭終。壽七十一。厥嬪氏曹。箋詩之曾。子曰景先。無祿絕承。有季昭先。守儒俟徵。墓在州南。先域接挹。集藏于家。厥帙爲十。維公儀觀。偉古動人。前聞後說。指掌剖陳。巍坐若尸。不傾不跛。彼諂有徒。正色以止。蒼蒼川淪。來者荒寒。昭銘墓門。以作後則。

